

四庫全書

史部

欽定四庫全書

史部

山西通志卷一百六十一

詳校官給事中臣王鍾健

檢討臣德生覆勘

總校官進士臣朱 鈐

校對官庶吉士臣吳裕德

謄錄監生臣何茹連

欽定四庫全書

山西通志卷一百六十

仙釋二

蒲州府

上古

紫府先生抱樸子真源黃帝以地皇九年正月上寅詣
首陽山宰牧從焉次駕東行詣青丘紫府先生授三
皇錄及天文大字次西入崆峒禮廣成子回駕王屋

啓石函發玉笈得九鼎飛靈神丹訣路史云陟王屋而受丹經

周

韓君丈人名終又名衆善幻養不服食年百歲其行如飛匿迹五老山阿不知所終

按王子年拾遺記閭河之北有紫桂成林其實如棗羣仙餌焉故韓終采藥詩云閭河之北實大如棗得而食之後天而老又抱朴子云韓終服菖蒲

十三年詩載古逸當是周秦時人

漢

趙昉臨晉人張道陵弟子有仙術後飛昇今永泉里趙昉村其遺名也旁有昇仙洞存焉

北魏

羅崇之河東人受道於中條山世祖令崇立壇祈請崇之云條山有穴與崑崙蓬萊相屬詔令河東郡給所須崇之入穴行百餘步遂窮後召至有司以崇誣罔不道

金史卷一百六十
奏治之世祖曰崇修道之人豈至欺妄以詐於世或
傳聞不審而至於此古之君子進人以禮退人以禮
今治之是傷朕待賢之意遂赦之

唐

閻家貞觀十四年為河東太守後隱中條山羅通微事
之十九年拜吉州刺史後表請入道賜名遺榮隸桃
源觀朝端盛賦詩以贈之今王官谷上方有閻使君
宅

羅通微臨晉人貞觀時母趙氏娠通微有雙鶴翼行既
生骨相巉巖稍長入山樵薪遇閭使君竊授以幻養
之術遂冠褐於五老峰之遊仙觀學步虛絕粒今太
乙峰南步虛坪其地也後使君出牧吉州召通微及
境有雙鶴樂聲自玉笥山來迎既就館一夕月色皎
然忽騰空吟嘯而去使君表其事詔吉州立真人堂
尋改降生之羅村為蓮臺村

張果不知何許人則天時隱於中條山往來汾晉間時

人傳其有長年秘術自云年數百歲矣嘗著陰符經
玄解盡其玄理則天遣使召之果佯死不赴後人復
見之恒州山中開元二十一年玄宗令通事舍人裴
晤往迎之果對使氣絕良久乃蘇晤不敢逼馳還奏
狀又遣中書舍人徐嶠齎璽書以邀迎之乃至東都
肩輿入宮玄宗親訪理道并神仙方藥之事及聞變
化不測而疑之有邢和璞者善算人知天壽善惡玄
宗令算果則懵然莫知其甲子又有師夜光者善視

鬼玄宗召果密坐使夜光視之不見果所在帝謂高力士曰吾聞飲堇無苦者奇士也時天寒因取以飲果果三進頽然曰非佳酒也乃寢頃視齒焦縮顧左右取鐵如意擊墮之藏帶中更出藥敷其斷良久齒已生粲然駢絜帝益神之欲以玉真公主降果未言也果忽謂秘書少監王迴質太常少卿蕭華曰諺謂娶婦得公主平地升公府可畏也二人怪語不倫俄有使至詔曰玉真公主欲降先生果笑固不奉詔有

詔圖形集賢院懇辭還山詔可擢銀青光祿大夫號
通玄先生賜帛三百疋給扶持二人至恒山蒲吾縣
未幾卒或言尸解為立棲霞觀

薛季昌河東人遇司馬承徵於南嶽授以玉洞經籙高
真屢降其室玄宗召入禁掖延問道德乃談及精微
上喜恩寵優異尋還山上贈以詩曰洞房修真客條
陽念舊居將成金闕要願奉玉清書雲路三天近松
墟萬籟虛猶宜傳秘訣來徃候仙輿翌日丹成曰祝

融峰今夕有天真會予被召當往遂凌虛而去

常醜女蒲州常志女貌陋有瘡疥屢藥勿瘳及笄無聘
問者一日出外以裳蒙首居人畏其裸而避之浴於
池出則體貌如玉身不著地騰空而去

呂巖字洞賓

一名巖客

禮部侍郎渭之孫河中府永樂縣人

一云蒲坂人

天寶十四載四月十四日巳時生成通中舉

進士不第遊長安酒肆遇鍾離權得道不知所往

有詩

集四卷

宋史陳搏傳關西逸人呂洞賓有劍術百餘歲

而童顏步履輕疾頃刻數百里世以為神仙數來搏齋中人咸異之 宋曾慥集仙傳呂洞賓又字希聖

九江人曾授真筌於正陽子

按別錄洞賓江州德化令棄官九江人非是

耿定向權子在昔呂純陽受學於雲房鍾子鍾子故為諸幻景歷試之猶未即授一日涕泣請鍾子曰子功行未累也呂曰何修而功行乃累鍾子曰須金百萬博濟於世始得呂曰弟子寡人何從辦此鍾子曰余有丹藥可化銅鐵為金子第懷此博施慎勿泄也

呂子請曰是金卒當變否鍾子曰須三千歲後還本
質呂子愀然跪曰如此則悞三千歲後人矣功行之
謂何鍾子悅曰善哉即此一念長生久視道在是也
呂子豁然悟鬯然懌已廢然起曰師道易易若是吾
將廣師旨普度世迷可乎雲房子曰汝試為之於是
度數千人乃復化身過諸所度者之門則數千人一
旦去盡呂子失意悵然而歸偃息河濱樹下雲房子
化叟曰吾非若輩比時老且衰百念俱灰自矢可身

相許矣願依子終身可乎呂喜晚得叟即許諾負之
渡河以歸至河中始悟其為師驚訝曰嘻師惟度我
我惟度師耶

附錄 鍾離簡咸陽人為郎中與弟俱入華山得
道白日昇天 鍾離權生而奇異美髯俊目身長
八尺餘棄世事入縣東四十里正陽洞修鍊登仙

附錄南宗 劉哲字元英號海蟾子一名操明
經事燕王劉守光為相雅喜性命欽崇黃老一日

有道人自稱正陽子來謁海蟾待以賓禮道人為
演清靜無為之宗金液還丹之要竟索雞卵十枚
金錢十文一文置几上累十卵於金錢若浮圖狀
海蟾驚曰危哉道人曰居榮祿履憂患其危殆甚
盡以其錢劈破擲之辭去海蟾大悟解印從道遁
迹終南山下丹成尸解有白氣自頂門出化鶴沖
天新興古志海蟾廣陵人為遼相後改名海今
廣靈即古廣陵縣也張用成號紫陽天台人

云一

興安州人 遇海蟾得金丹訣治平中訪扶風馬默處厚

於河東授以所著悟真篇元豐五年夏趺坐而化
壽九十有九 石泰號杏林岐山人嘗有德於紫

陽紫陽授以金丹訣著書見道書全集 薛道光

一名式一名道原字太源陝府雞足山人

一云閬州人

嘗為僧法號紫賢一號毗陵禪師雲遊長安宋徽
宗崇寧五年丙戌冬寓鄒遇石杏林傳授口訣真
要乃註解悟真篇作復命篇及丹髓歌行世壽一

百十四歲尸解 陳楠號泥丸閩人受金丹訣於
紫賢著書見道書全集 白玉蟾即葛長庚也號

紫清瓊山人受金丹訣於泥丸著上清武夷二集

綺錯瀾翻今行於世嘗曰吾從老年得手詔封紫

清明道真人

純陽瀝傳海蟾紫陽杏林紫賢泥丸
紫清是之謂南宗志稱正陽累雞卵

蓋正陽引其端而
純陽實傳之也

附錄北宗 王嘉字知明號

重陽子京兆咸陽人嘗醉於甘河會二人授修真
口訣時年四十有八所遇者唐呂純陽化身也再

遇於醴泉嘉趨拜之邀嘉飲嘉問其鄉閭年姓答
曰濮州人年二十一而不告其姓留秘語五篇令
嘉讀畢焚之且曰速去東海投譚捉馬俄失所在
後領馬鈺等住寧海州崑崙山將沒謂門人曰丹
陽已得道長真已知道吾無慮矣處機所學一聽
丹陽處元長真當管領之又顧處機曰此子異日
地位非常必大開教門者也書物外親眷詩奄然
而逝馬鈺嗣其教與譚劉丘相繼為宗盟今全真

學者稱鍾呂劉為三祖又以嘉為祖師元至元六年贈重陽全真開元真君其遺文全真前後韜光集行於世 馬鈺字宜甫寧海州人金世宗大定七年七月王嘉抵寧海邀館於私第初宜甫夢其園一鶴從地湧出嘉至同擇地立菴嘉指鶴起之處命名曰全真全真之名始此宜甫執弟子禮嘉名之曰鈺字元寶號丹陽子 譚玉來見嘉固請為弟子嘉名以處端字通正號長真子 王處一

聞嘉至來謁師禮之後嘉飛蓋致其名號名處一
號華陽子 郝昇賣卜於市嘉入其肆背而坐焉
昇曰請公頭回嘉應聲曰君何為不回頭耶遂執
弟子禮賜名曰璘號恬然子又號太古 丘處機
棲霞人年十九聞嘉在全真菴投謁於齋次嘉知
其為遠器贈以詩賜名處機字通密號長春子

劉處元字通妙師重陽後贈長生輔化明德真人
孫氏馬鈺妻名不二號清靜散人五月五日王

嘉令燒誓狀

純陽傳重陽重陽傳劉丘譚馬郝王孫號一花開七葉是之謂北宗長春

嗣教最盛號龍門派今直省道觀胥龍門派也

純陽重陽世次太遠按純

陽呈鍾離雲房生在儒家遇太平懸纓重滯布衣

輕誰能世上爭名利臣事玉皇歸上清得火龍真

人劍法昔年曾遇火龍君一劍相傳伴此身天地

山河從結沫星辰日月任停輪須知本性綿多劫

空向人間歷萬春昨夜鍾離傳一語六天宮殿欲

成塵送鍾離雲房赴天池會詩得道未來相見難

又聞東去上仙壇杖頭春色一壺酒頂上雲攢五
嶽冠飲酒龜兒人不識燒山符子鬼難看先生去
後身須老乞與貧儒換骨丹獻鄭思遠施真人二
仙詩萬劫千生到此生此生身始覺飛輕拋家別
國雲山外鍊魄全魂日月精比見至人論九鼎欲
窮大藥訪三清如今獲遇真仙面紫府仙翁得姓
名又詩因看崔公入藥鏡令人心地轉分明陽龍
言向離宮出陰虎還於坎位生二物會時為道本

五方行盡得丹名修真道士如知此定跨赤龍歸
玉清參黃龍機悟後呈偈棄却瓢囊撼碎琴如今

不戀水中金自從一見黃龍後始覺從前錯用心

鍾離雲房崔公今入藥鏡存
鄭思遠施真人當屬唐時人贈陳處士詩青霄一

路少人行休話興亡事不成金榜因何無姓氏玉

都必是有仙名雲歸入海龍千尺霜滿長空鶴一

聲深謝宋朝明聖主解書丹詔詔先生哭陳先生

詩天網恢恢萬象疎一身親到華山區寒雲去後

留殘月春雪來時問太虛六洞真人歸紫府千年
鸞鶴老蒼梧自從遺却先生後南北東西少丈夫
陳處士陳先生胥指陳希夷也宋太祖太宗時人 贈滕宗諒詩華州回道

人來到岳陽城別我遊何處秋空一劍橫謁石守
道詩高心休擬鳳池遊朱紱銀章寵已優欲待禍
來名欲減林泉養法預為謀

滕宗諒石介
宋仁宗時人

搖頭垓

歌君不見洛陽富鄭公說與金丹如盲聾執迷不
悟修真理焉知潛合造化功又不見九江張尚書

服藥失明神氣枯不知還丹本無質翻餌金石何
太愚又不見三衢趙樞密叅禪作鬼終不識修完
外體在何邊辯捷語言終不實

富弼趙抃宋神宗時人

又神

宗元豐中呂惠卿守單州天慶觀七月七日有異

人過書二絕句於紙四海孤遊一野人兩壺霜雪

足精神坎離二物君收得龍虎丹行運水銀野人

本是天台客

賓字

石橋南畔有舊宅

石橋者洞也

父子生

來有兩口

呂也

多好笙歌不好拍

吟也

張天覺為相日

有藍縷道人及門求施天覺不知禮敬因戲問道
人有何仙術答以能捏土為香天覺請試為之須
臾烟罷道人不見但留詩於案上云捏土為香事

有因世間宜假不宜真皇朝宰相張天覺天下雲

遊呂洞賓

呂惠卿張商英宋
哲宗徽宗時人

又徽宗齋會詩高談

濶論若無人可惜明君不遇真陛下問臣來日事
請看午未丙丁春金大定三年過故里詩余自金
鑾謁帝回首陽鄉國暫歸來羣迷不識吾家趣何

日重尋閭苑媒其他時代名位不著暨雜出諸傳
記者不具錄朱子亦言南渡前相傳人士多遇呂
洞賓蓋其氣未散南渡後乃稀見之重陽以金大
定六年至寧海州崑崙山而生四十有八歲始遇
濮州人計其始生當在宋徽宗時然則純陽重陽
之授受豈所謂六合之內存而不論者邪志之以
畧具顛末

張復澧州人柳宗元龍城錄復飽書帙作條山集三十

卷論世外事此人兼得神鬼趣隱不仕有文集行於世

侯神仙虞鄉人從師道清觀資性篤實人稱憨子師令汲水見一異童輒與戲失期被師笞侯以實告師授以鐵針紅線令簪童頂侯如命童歸入葡萄架下掘地獲人參形如童師烹於釜中下山訪友侯聞異香竊食之盡棄餘汁於犬師歸大怒將予杖侯與犬竟飛去

陸禹臣字服休河東人避黃巢亂入南嶽得仙術隱宜
州北山後尸解為紫府仙伯嘗寓吳道生家與語塵
外理贈詩曰露下瑤簪濕雲生石室寒星壇鸞鶴舞
丹竈虎龍蟠

宋

柴通元閬鄉人為道士於承天觀年百餘歲善辟穀長
嘯惟飲酒言唐末事歷歷可聽真宗祀汾陰召至行
在命坐問以無為之要齎茶藥束帛詔還本觀

金

劉志淵字海南萬泉人事親至孝夙慕仙道自號元冲
子後遇長春真人於棲遊菴避兵綿山雖萬騎蹂踐
獨不懼害壽七十九歸真

元

李純夫燕山人弱冠登進士不樂仕進棄官為黃冠卜
隱王官谷構了了菴於貽溪之上菴後建白雲洞自
號孤雲子有秦無隅者純夫高弟子也無隅弟子有

古村之關希哲太平之李道微皆以道行著純夫大德二年卒年五十八儒學教諭賈履信為之贊

舊志謂純夫唐時人玄宗召之不起誤

薛元曦字元卿河東人徙貴溪年十二辭家入道龍虎山師張留孫吳全節延祐間用薦召見侍祠制授大都崇真萬壽宮提舉陞提點上都崇真萬壽宮泰定元年扈從灤陽還至龍虎臺喟然而歎即日辭歸闕清寧齋見心亭熙明軒築瓊林臺於龍虎山之西日

與學仙者相伴其間而密修大洞迴風混合之道至
正三年制授弘文裕德崇仁真人佑聖觀住持兼領
杭州諸宮觀遣弟子攝其事五年卒年五十七自號
上清外史著上清集樵者問會梓羣賢詩文為瓊林
集元卿負才氣尤長於詩揭曼碩留瓊林月餘齋三
日乃為作序稱其老勁深穩如霜松雪檜百折莫能
撓清拔孤峻如豪鷹俊鶻干呼不肯下蕭條閒遠如
空山流泉深林孤芳自形自色不與物競人以為知

言元卿工書人爭靳得之聞風者或使圖其像以去
見心亭後有土阜人稱薛公墩

女冠王教山舊籍關中遇焦處士旋棄家攜子息學道
遍遊名山習服氣鍊形訣最後寓蒲甚久年大耋黥
髮丹顏無疾奄逝有解弢傳行於世

董鐵驢萬泉人通遁術行步如飛倏忽數百里後尸解
仙去

明

張三丰平陽人一云猗氏人有仙骨修髯如戟膚如冰
雪途遇麻姑教以服四味龍芽後遊武當山登祝融
峰嚼梅花滿口朗誦南華秋水篇觀潮上日出大叫
曰雲海盪吾心胸題揚州瓊花詩云璚枝玉蒂屬仙
家未識人間有此花清致不沾凡雨露高標猶帶古
煙霞歷年既久何曾老舉世無雙莫浪誇幾欲載回
天上去擬從博望借靈槎蓋自況也明太祖咨以時
務曰惟本忠孝後成祖遣尚書胡濙物色之終莫能

得

房居士臨晉人名景圓號睡松子少精書算主案牘被
督喟然歎曰人生如朝露何自苦辱如此遂棄家入
中條山修道閉關十一年糧絕出山止宿虞鄉村扁
鵲廟中夜有真人口授先天真訣遂往汾北麻衣山
默坐二十一年移居平陽之姑射山洞虎狼皆馴伏
旬月不炊爨巡撫于謙問休咎笑而不答謂弟子曰
無結果卒如其言人有訪者先知輒避去太守胡睿

叩之曰老農無所知也成化甲辰三月十五日沐浴
端坐書十勸文皆教人忠孝語書畢卧化先是洞中
有石牀二左右對峙唐時得道者卧化塑其屍於左
至是塑居士屍於右

楊攀桂丹桂蒲州人好釋老家言兄弟偕隱終南山其
子屢饋扉屨遂入深山不出又數年鄉人有見於京
都者云

大陳小陳猗氏太清觀道士叔姪也得顛術常夏月碾

麥戲語人曰日烈甚宜入礪中避之遂入礪後寢神
遊一日題詩壁間止留空室莫知所往

高錄猗氏人常於孤山採藥遇劉海蟾授長生訣坐卧
一室寒暑不出後村人欲焚池忽出曰此萬古利也
當為若置石授人一鞭入山驅石若飛石今存後卒
妻子俱失所在

張神仙崇禎間至蒲州主侍郎張廣多幻術士人欲遣
妓亂之須臾隱入壁中自是不知所往

以上仙

晉

佛圖澄事見晉書嘗卓錫於中條白石寺炊粥無具寄
米於屠牛釜中人嫌其染腥污臟澄乃出腸浴於泉
至今泉上有血絲痕嘗畜一驢一猫食乏則遣驢駝
帖乞糧村舍猫踞驢背或有要奪者猫即投地變虎
人莫敢近今猫驢塚猶存寺前後卒於鄴宮寺

隋

神尼名智山蒲坂劉氏女少出家有戒行沈靜寡言談

吉凶成敗皆驗文帝誕日忽至其所名帝為那羅延
且曰兒不可處俗間遂割宅為般若寺將帝躬自撫
養一日尼出付帝於其母母視帝頭忽出二角投之
地尼心動急歸抱之曰何驚吾兒使晚得也後周滅
二教尼隱楊氏戒行不改隋初重興佛法每以神尼
為言歿後即葬寺中為起金浮圖又命王劭作傳改
所居般若寺為大興國仍令天下舍利塔內各作神
尼像

曇延蒲州棲巖寺僧猗氏侯王卓之後年十六身長九尺餘垂手過膝目光外射初聞講涅槃經悟旨詞辨優膽有薛居士者學總元儒聞而謁之言謔相高戲題方圓動靜四字命延體之延應聲曰方如方等城圓如智慧日動則識波浪靜類涅槃室薛驚歎曰由來所未見希世挺生即斯人也開皇間旱命延禱之甘雨大注臨終遺啓云法王御世最荷深恩護持三寶始終莫二言訖而逝

慧海姓張氏虞鄉人曇延弟子也年十八講涅槃文旨
洞曉周建德中竄入陳隋初文帝姊成安長公主欽
其德望立伽藍靜法寺居之仁壽前文帝頒頒璽書
分布舍利每感異祥大業二年卒於寺見高僧傳

唐

志寬河東人博覽諸經以涅槃地論為心要時邑多虎
暴都督張遜命禱之患遂息貞觀中蒲晉旱寬曝烈
日中須臾大雨闔境霑足

道慈性張氏虞鄉人曇延度為弟子晚住蒲州仁壽寺
大業末因事返京夜停關首主見慈馬壯勾盜欲竊
之夜往其所乃見十人圍繞擐甲執兵乃合面歸懺
焉唐貞觀中有請講涅槃者堅不受請人不解告之
曰所以固辭者恐不終此席耳後果念經三日卒於
山年七十有五卒經夕異花披池湧出莖長二尺許
色甚鮮榮折納餅中逾年不萎見高僧傳

靈潤俗姓梁虞鄉人依靈燦法師住興善寺年十三初

聽涅槃即通文旨後聞泰岳靈巖寺僧規清肅乃杖策尋焉貞觀中與法侶登山野燒四合衆皆奔惟潤安行顧語曰心外無火火實自心謂火可逃無由免火及火至潤燔餘自斂後住弘福寺僕射房元齡稱歎曰居宗揚化惟此一人也見高僧傳

神迴臨晉人俗姓田貞觀間流化岷峨為道俗宗師

普寂姓馮氏蒲州河東人少時遍尋高僧學經律時神秀在荊州玉泉寺寂乃往師寺凡六年神秀奇之盡

以其道授焉久視中則天召神秀至東都神秀因薦
普寂乃度為僧及神秀卒天下好釋氏者咸師事之
中宗制令代神秀統法衆開元十三年勅於都城居
止王公士庶競來禮謁嚴重少言遠近尤重之二十
七年終於興唐寺年八十九時都城士庶會謁者皆
制弟子服有制賜號大照禪師及葬河南尹裴寬哀
麻列於門徒之次士庶傾城哭送閭里為空

慧旻字元素河東人著十誦私記十三卷又僧尼行事

三卷尼衆羯磨二卷菩薩戒義疏四卷見唐藝文志
五代

僧善住河東普救寺寺初名西永清院漢乾祐元年招
討使郭威督諸軍討李守貞周歲城未下召善問之
對曰將軍若發善心城必克矣威折箭為誓異日城
破不戮一人遂易今名

宋

重宣姓趙氏虞鄉人河中開元寺僧幼穎異十五禮文

澈師為沙彌二十一依澄暉受具戒振錫遊方剝心
求法凡讀大藏經一萬餘通誦佛頂真言三十萬過
秋官貳卿寇公準重其行薦之帝庭賜紫方袍以旌
其德咸平四年四月庚戌示寂楊億撰塔記

元

月公普救寺僧精於戒律弘教大師慧印嘗從之學圓
覺了義

明

洪濟禪師猗氏靈巖寺僧有道行演通大小乘法遊金陵明太祖登極前風雨彌旬上不懌募有能止者洪濟應詔杖錫一呪即便開朗上大悅為印經一藏給傳以歸

福登號妙峰七歲祝髮依蒲坂萬固寺郎和尚習瑜伽法初不識經典苦行於中條讚歎寺閉關立禪三年尋見永明禪師聽講楞嚴即解悟無不通曉渡海謁普陀回住五臺山龍翻石刺舌血書華嚴一部修建

無遮道場神宗聞而嘉之賜繡冠繡衲真來佛子之
號移錫蘆芽造萬福鐵塔鑿萬福石洞峩嵒造銅殿
二五臺一華山一俱莊嚴精妙太原建浮圖於郡城
左慈聖后佐以金錢塔成雙峙名曰宣文後歸臺山
坐逝遣中常侍賜祭葬

以上釋

遼州

五代

妙惠節度使王建女賜紫號嚴因大師智超建孫賜紫

號妙果大師胥有道行

明

洪樹遼州人幼蒙修穎悟諸品經義無不洞曉人呼聖
僧後住持香林寺禁步二年一日談經而化

子端榆社人蚤歲祝髮雲遊晚歸值時艱捐金建上下
城敵樓以成保障人胥義之

沁州

上古

錢鏐帝顓頊之孫陸終氏之中子封於彭城故稱彭祖
初聞上黨黎城九仙女有道行往師之得導引行氣
術隱雲母山時遊沁州南里或云葬里中彭家溝今
墓存

周

琴高真人列仙傳云趙人以鼓琴為宋康王舍人行涓
彭之術浮遊冀州及涿郡間二百餘年後辭入涿水
中取龍子與諸弟子期曰皆潔齋待於水旁設祠果

乘赤鯉出坐祠中且有萬人觀之留月餘復入水去
今沁源東即寓居地也

按史記索隱曰戰國策呂氏春秋皆云宋王偃謚
康王

唐

韓湘子修武人韓愈之從孫十二郎之子也嘗於沁州
南八里修鍊建塔一鄉人立祠祀之

風雷將軍姓焦氏武鄉人唐懿宗朝父為掾吏有陰行

咸通九年生將軍七歲不語兩手不展父母欲棄之
忽元日手展能言性穎異及長凡天文地理易象遁
甲咸臻其妙景福元年夜夢日華貫頂有道者送石
匣曰此天真賜汝也覺而開視皆龍文虎篆莫能辨
識焦秘而藏之遇異人指授兼賜龍璽寶劍各一遂
能軼風駕霧鞭笞鬼神出入幽顯無礙會上黨妖祲
為災往除之事聞賜號風雷將軍卒年三十四金加
封昭澤龍王

金

閻真人名密沁源縣吏棄俗學道結菴於紫金山居二十餘年尸解大定中賜額名其菴曰太清觀後延樓煩薛道紀居之有道行

元

唐善慶沁源人薛道紀之徒得師奧旨以救人為事延祐二年事聞勅賜金襴紫服和光大師

明

呂雲仙沁州人成化間修真元妙觀善黃白術觀中像
胥點金飾之徒張道元索其術不授會雲仙入山道
元力索之卒不授以死道元返荷鍤往瘞至則屍無
存矣

王威沁州人習苦行孑處花山巔晨夕焚誦人莫知其
道術嘉靖戊寅忽示衆化期里社始驚異如期雲集
威辭衆入巖結跏趺坐須臾白氣上冲神遂往數日
如生里人就真身塗飾之後知州俞汝為扣其遺蜕

磴磴有金玉聲撰王仙傳

以上仙

唐

先師菩薩名侶相傳懿宗第三子僖宗弟也黃巢入長
安出奔五臺祝髮為僧遊沁源靈空山見林木深茂
人跡罕至有馬跑泉之異卓錫居焉昭宗景福二年
圓寂宋太宗端拱二年賜所居寺額曰聖壽

金

基公靈感院僧性濶達衣鉢外不留一物嘗造叢塚瘞

金史卷一百六十一
卷一百六十一
尸四萬五千有奇壽七旬餘卒大定癸未詔增廣伽藍特賜院額曰靈感

明

海貴栢林寺僧武鄉人性純樸篤志焚修供水陸者五
檢藏經者二襲師衣鉢積貯頗豐悉捐之萬厯十四
年正月命其徒持佛號曰吾將去矣危坐而化

國朝

普汰號純如沁州靈泉寺僧戒律精嚴兼通文翰順治

間遊都城

御書佛字賜之知州汪宗魯建

御書樓於寺圓寂前十日手書素扇十柄遍遺知交展之胥歸家頌也比衆至已逝矣

性休號尺木俗姓朱大同人幼補弟子員善詩文工草隸值閭賊之變棄家雲遊戊子始薙髮於雩之龍坑菴從崆峒戒子傳衣鉢遊漢口遇不退禪師棒喝悟道卓錫於沁之永慶寺歲癸巳正月日早齋畢忽乞

十王殿前地於院主院主允之遂趺坐而逝夜半復甦索筆書塔銘曰卜地卜地三上之三乘時乘時二月之二萬彙萌芽造化順理一稼反生吾道乃逆遇雷而鳴逢火出世至二月二日出定沐浴扶至塔前對衆說偈擲杖而化著有銅鞮語錄

以上釋

平定州

唐

李賓諱通元又號長者宋熙寧元年七月宗勝撰長者

行蹟云唐李長者皇枝也諱元童

碑記皆作通元

但言滄州

人開元七年至太原孟縣大賢村有高山奴延納安居長者每日惟食棗十顆栢葉餅子一枚不交外人掩坐獨處含毫臨紙曾無虛時如是三稔一日捨山奴至馬家谷古佛堂自構土室寓於其側端坐宴然於斯十年後復囊挈經書遵道而去次冠蓋村忽逢一虎馴伏長者告以吾欲著論釋華嚴經可與吾擇一棲止處言畢虎起徐而撫之遂將所挈經囊掛於

虎背於是虎望神福山原直山二十餘里當一土龕收囊於內龕之四旁舊無澗泉長者始來之夕風雨暴作拔去一松化為一潭僭陽之歲祈求必應長者製論之夕心窮元奧出白光以代燈燭居山之後忽有二女子容華絕世皆可笄年俱服布衣悉以白巾幪首姓氏居處一無所言汲水焚香供給淨饌莫知所止歷有五祀著論將終遂爾絕跡長者身長七尺二寸廣眉朗目丹唇紫肌長髯美茂修臂圓直髮采

紺色毛端右旋殊妙之相靡不具足首冠樺皮身披
麻衣長裙博袖散腰而行居常跣足放曠人天忽一
日出訪舊止之里適值野人聚族合樂長者曰汝等
好吾欲將歸衆乃必謂却還滄州揮淚懇留長者曰
總在百年會當歸去於是衆送還龕所復衆曰去住
常然汝等可各還家翌日長叟結徒禮候但見姿容
端儼已坐化於龕中報齡九十有六時當三月二十
八日也

元

郭罕然孟縣人寓平定州之娘子關至山中見一洞水流飛瀑而下罕然入洞得異書遂善遁法或令入瓶呼之輒內應碎之片片皆應人咸怪之

平定州志作明洪武初人

劉八郎孟縣人有道士授異書遂通遁術相傳至揚州歸飯猶未熟云

明

劉偉朝邑人正德間舉人任文水令擢監察御史陞究

州知府得仙術尸解相傳隱平定山中為人推命奇
中平定甄給事成德李知府愈為諸生時從之遊初
會城陳中丞琳嘗與同臺巡按兗州親弔其喪及家
居識諸市疑其仙也呼來飲酒話舊密報當事至者
接踵論休咎胥驗後不知所往

國朝

還陽子姓郭氏名靜中修武人幼時嘗夢驅龍為行雨
狀差長棄家適華陰遇異人授以金丹五雷法由是

號還陽嘗往來晉趙燕齊豫章楚粵間歲旱當事輒
走書數百千里迎禱雨還陽以掌中雷印據案擊則
霹靂應聲大雨如注求者衆第書符付之符甫入境
雨隨集藁城苦河患以法鎮之河徙數里歷城趵突
泉涸以鐵符券三納之泉復出後過壽陽太安鎮曰
此去西北里許有吾容足處遂定居五峰山之龍泉
菴順治初年近百歲顏色如童子一日呼門人具浴
浴畢端坐而逝

以上仙

元

普惠平定人號洞雲住壽聖寺能詩有戒行與中書左丞呂思誠為方外友呂嘗作洞雲歌贈之及呂北上惠貽詩曰君王若問榆關郡地瘦民貧山水多後徙獅子山石巖下年九十八化今名其地曰禪巖

明

讓大師號衲空一號罕峰相傳為陝右人筮仕長吏後棄官雲遊得佛法於五臺山達觀禪師遂棲獅子窟

與憨山海印妙峰輩五十三人為淨友達觀示寂乃
卓錫方山之昭化院戒行精嚴工吟咏晉潘岳潘雅
敬之萬歷中賜為紫衣大師嘗貯粟於掌鳥雀馴集
掌上就食後無疾跏趺而化

淨大師號道圓卓錫風溝之關帝廟頻夢關聖一日謂
弟子曰三日後亟備龕具至期沐浴坐化

以上釋

忻州

北魏

智仙姑永安間副尉智重顯女幼航空寂年及笄不嫁
禍福多前知問之不語一日入山坐化建塔藏之今
東南山曇陽寺有仙姑塔

元

王志常忻州人幼時牧牛田間遇異人挈之而行遽至
河南天壇之陽臺宮後八年來歸父母驚喜疑其死
而復生遂度為天慶觀道士氣質渾厚信受道之器
年近九十留頌而逝見元好問天慶觀記

李之和元真觀道士博學工詩嘗與元遺山李牛臺賡
和人謂其有仙風道氣云

五公者天公地公宋公退公窮公莫知所從來愛聖阜
之勝各就一山修鍊迄今以五仙名洞名鄉五公名

寨

以上仙

唐

釋元奘即三藏緱氏人俗姓陳名祿年十一誦維摩法
華慕大法達長安住莊嚴寺西踰劍閣達蜀都受諸

經論一聞不忘遍遊荆揚訪道復還京輦貞觀三年
奉勅往西域取經六百餘部十九年還京住玉華寺
翻譯經藏後奘如臺山覽勝往來定襄弔藏孤故址
建保孤祠徜徉白鹿原而去麟德元年告其僧衆曰
有為之法必歸磨滅泡影形質何得久停行年六十
五必卒玉華曷葬我於白鹿原尋果逝兩月而色貌
不變弟子以奘遺命移葬焉今其墓尚存土人呼
尚圍

打地和尚傳心要於江西馬祖退隱定襄縣往來深山
與虎豹羣居踪跡神異有問佛法者以杖三打地或
匿其杖而問焉則開口而已唐大厯中跣趺入滅葬
酈村塔宋張商英撰記

宋

舍利和尚慶厯四年至橫山興國寺作院主每日吾欲
焚身特需其候明年正月十八果用三昧火自焚得
舍利數粒鄉人建塔勒碑識之

金

懶牧和尚忻州人住興國寺戒行精嚴後僧從南方來
彌獲聞深密諦天德中書偈而逝茶毗得舍利建塔
城西原有見其杖錫相隨者云

慧英和尚號木菴居龍門山寶應寺有精行趙王欲見
之英先覺命徒曰當負我出山至金門寺回視則山
崩矣其徒負至端坐而寂

元

法空漢川人俗姓古出家遊忻州依懶牧和尚居萬安
禪院日誦寫華嚴經元大德中微疾誨徒出頌畢奄
然而逝茶毗得舍利十餘粒

了空忻州人姓王氏幼神異年二十遠遊後出家華蓋
寺能前知嘗遇僧云修行當學最上乘前知特小乘
法耳又數年遂大徹悟一夕作偈曰無物本來真身
心何處尋人法雙亡却虛空現法身遂逝茶毗烟騰
五色衆異之

以上釋

代州

五代

劉鉉英號海蟾子燕廣陵人明經擢第仕燕為相雅喜
性命之學一日道士來謁待以賓禮問姓名不對自
稱正陽子海蟾師事之道士授丹訣海蟾棄官易服
從之至秦州陶真於秦華終南之間復南遊楚尚書
郎李觀自言為進士時過潭州堽亭買酒忽一人荷
竹奩持釘鉸具徑至問觀曰聞君將之南嶽頗識養

素先生藍方否觀曰固將往見之其人曰奉煩寄聲
劉處士十月懷胎如何出得言訖去觀至南嶽訪方
具道其語方愀然驚歎曰吾不遇此命也所謂劉海
蟾者也吾養聖胎已成患無術以出之非斯人不足
成吾道今聲聞相通而不得接吾道不成矣觀急回
訪於潭州已失所在後隱代州之鳳凰山遊歷名山
所至多遺跡丹成尸解有白氣自頂門出化鶴去元
至正六年詔贈明悟弘道真君

宋

闕道寧雁門人號休休子幼為釋已而學道養真於鳳凰山之來儀觀年八十四尸解

劉妍代州姬見宋曾慥集仙傳

金

姬志元高平人號崇道大師洞明子先住遼沁又嘗留宿五臺邑人築環堵居之積十五年觀成額曰明陽元

梁思問字辨疑崢縣朝元觀羽士也敏慧通文為元門
所宗嘗與元好問遊

王朴字淳甫遼東廣寧人貞祐初以行省員外郎督餉
至崢因家焉乃創道館於州西北隅扁其軒曰虛白
辟穀修真一時士夫如元遺山內翰李封龍輩皆造
其廬推重之語見遺山山行紀因紀其一絕云歲花
空自老消息更誰知到此輕塵利功名自可遺

以上
仙

漢

摩騰法蘭中印度二尊者永平七年正月孝明夜夢金
人身高丈餘赫奕如日來詣殿庭旦令占之傅毅對
曰臣覽周書異紀云西方有聖人出其没千載教當
及此所夢無乃是乎上遣王遵等十八人西訪至月
氏遇二尊者延請東還以釋迦文佛畫像並經四十
二章進披氎覩像果與夢符上以預夢告騰蘭對曰
此如來以大法來囑願勉之上問此土豈無居化地
耶對曰此土有五臺乃文殊大士所居攝化無量天

龍鬼神然非戒定澄神莫能覩也至次年春禮清涼
山回奏請鼎建伽藍復言山形宛同印度靈鷲山寺
宜即用為名上以始信化緣加大孚靈鷲寺仍度僧
數十居之五臺化宇自此興矣

北魏

靈辨懸甕山沙門熙平初頂戴華嚴日夜行道於五頂
之間足破血流曾無少怠一夕松下坐忽爾心光凝
湛見異比丘摩其頂曰子勤苦且久當以信心入三

摩地矣自是一切文字觸目氷釋造華嚴論一百卷
孝明帝請於式乾殿敷揚奧旨宰輔重臣皆北面而
聽後終於清涼

東魏

曇鸞大師雁門人年十四即出家內外經籍及四論佛
性彌極窮研讀大乘經詞義深密因為注解成疾周
行醫療行至汾州城東門忽見天門洞開由斯疾愈
欲繼前作顧而言曰命危脆不常江南陶隱居者方

術所歸遂往從之既達梁朝屈隱居所接對欣然授以仙方十卷還至江有鮑郎子神者一鼓湧浪七日師以情祈告帖然安靜達魏辭往名山依方修法後至潞州逢三藏菩提留支師請曰佛法中頗有長生不死法勝此土仙經者乎支即以觀經授之曰修此當得解脫生死也師即受行調心鍊氣對病結緣流靡弘廣魏主重之號為神鸞勅令住并州大寺晚移住石壁元中寺魏興和年卒卒之日天樂西來異香

滿室因出調氣論又撰禮淨土十二偈續龍樹偈安樂集兩卷廣流於世仍自號為有魏元簡大士云

隋

解脫和尚代州邢氏子壯歲於臺山昭果寺披剃從抱腹山志昭禪師叅學昭甚器之尋返昭果晝誦大乘夜則禪觀嘗於東臺麓見草衣比丘跏趺石上即前叩首比丘指金蓮花解脫顧之即失比丘久之復現半身語曰夫解脫者當求諸已而由人乎於是狂機

頓歇深契大法普度垂五十餘年後莫知所終

唐

窺基俗姓尉遲鄂國公敬德姪也童年依元奘法師披
剃永徽甲寅年十七特旨度為大僧叅譯經論過目
成誦從奘師受瑜伽唯識宗旨著論百本窺基每遇
出載經書食饌盈三車時呼三車法師永隆中遊五
臺棲托一載奉詔旋京明年將順世告其徒曰十方
刹海遊戲之場兜率故苑吾將歸矣趺坐而逝御製

像讚悼之

道宣律師吏部尚書錢申之子母夢日輪貫懷而生少
事習誦長叩元關嘗遊清涼至中臺夜方禪寂有天
童子侍於右曰我名元暢乃天人也聞師居此故來
相候道宣曰聖人境界果何在耶答曰師不聞一法
無異三人殊見者乎蓋隨其業報所見各異若某見
清涼山則碧瑠璃色諸臺麓皆雜寶林至菩薩住處
非我所及知也言訖而隱

清涼國師澄觀字大休會稽人姓夏侯氏生於開元戊寅身長九尺四寸垂手過膝口四十齒目光夜發晝乃下眴天寶七載出家至德二年受具詔入內譯華嚴大歷三年又詔入內與大辯正三藏譯經為潤文大德既而辭入五臺駐錫大華嚴寺博覽六藝圖史九流異學竺經梵字及四圍五明聖教世典等書靡不該洽自是筆無停思著述華嚴無間貞元十二年上遣河東節度使禮部尚書備禮迎入京同闕賓般

若三藏翻譯烏茶國所進華嚴既就進之上大悅賜
紫方袍號教授和尚十五年授鎮國大師四月上誕
節勅有司備儀輦迎入內殿闡揚華嚴宗旨旋賜號
清涼開成三年三月六日圓寂澄觀生歷九朝為七
葉師春秋一百有二後人尊為華嚴六祖文宗輟朝
三日奉全身塔於終南山未幾有梵僧到闕奏稱葱
嶺見二使曰北印土文殊堂神也東取華嚴菩薩大
牙歸國供養有旨啓塔果失一牙唯三十九存焉遂

閣維得舍利光明瑩徹舌如紅蓮建塔號清涼國師
妙覺之塔相國裴休奉勅撰塔銘碑記

隱峰姓鄧氏邵武人幼不慧父母聽其出家初遊馬大
師門復來往石頭後於馬祖言下契悟冬居衡嶽夏
住清涼唐元和中路出淮西屬吳元濟阻兵隱峰曰
吾當為解紛乃擲錫空中飛身而過兩軍鬪心頓息
遂入五臺於金剛窟前將示寂先問衆曰諸方遷化
坐去卧去吾嘗見之還有立化者否曰有還有倒立

而化者否曰未之見也乃倒立而化衆昇就茶毗屹然不動隱峰有妹為尼乃拊而咄曰老兄疇昔不循法律死更惑人以手推之憤然而蹈遂就闍維收舍利塔於北臺之頂

從諗禪師曹州郝鄉人姓郝氏幼於扈通院從師披剃未納戒便抵池陽叅南泉言下悟理乃往嵩嶽琉璃壇納戒仍還南泉復往趙州觀音院嘗九遊五臺每到必經夏而返一日復束裝有僧作偈留之云正眼

觀時非吉祥從諗搗住曰作麼生是正眼僧無對負
囊便行繇此道化遠被幽晉間唐乾寧四年仲冬二
日枕右脇而逝壽一百二十歲謚號真際大師

太原孚上座蜀人久住臺山後遊浙閩復回臺山不出
者二十餘年諸方胥目為太原孚上座

宋

慧悟大師唐李氏子纔學語即稱妙法蓮華其親異之
捨令出家於五臺真容院戒律精嚴儀容竒偉元祐

初詔入內庭應對稱旨賜紫衣授職僧正崇寧改元復詔赴京苦辭不獲行至佛道店曰既逢佛道吾可歸矣乃屹然而化勅還龕本山建塔藏之

僧真寶代州人為五臺山僧正學佛能外死生靖康之擾與其徒習武事於山中欽宗召對便殿眷賚隆縟真寶還山益聚兵助討州不守敵衆大至晝夜拒之力不敵寺舍盡焚帥下令生致真寶至則抗辭無撓帥不忍殺使郡守劉駒誘勸百方終不顧且曰吾法

中有口回之罪吾既許宋以死豈當妄言也怡然受戮北人聞見者歎異焉

成覺代州張氏子幼依善住院和希大德受業希受僧統加號慈懿大師住清涼寺覺從諮決法要服勤三載希知其法器勉令叅方覺聞明教嵩和尚名即往依焉朝夕諮決所疑廓然有得辭歸五臺嵩曰吾道北矣至山學者日衆壽逾八十而化

金

善慧崞縣霍氏子幼願出家父母強之娶三年無染始
聽詣清涼山依成覺為師天德間賜號宣秘大師鑄
印掌教臨終謂弟子曰吾住山以來已事未純徒為
僧務累徇輕而遺重其德虧矣爾曹勿踵吾陋跡言
訖而逝

法沖大師五臺山僧大定三年黃冠蕭守真奏請與沙
門角力上許之召法沖入京止昊天寺明日集殿庭
法力勝守真世宗嘉歎賜儀仗送至五臺勅建萬歲

寺居之

蘇陀室利中印度那蘭陀寺僧慕清涼文殊住處與弟子七人航海而來殞者三還者三惟蘇陀室利六載始達臺山時年八十五矣經一臺頂誦華嚴十部禪寂七日不息不食後化於靈鷲峰弟子佛陀闍毗收舍利八合持歸西土

元

正順蔚州高氏子依臺山壽寧用公薙髮旋受具足戒

頂誦華嚴經行住不捨太后三詔不赴授五路總管
堅辭不受成宗幸山特加禮遇臨終書偈坐脫收舍
利無算建塔藏之

信明字真覺五臺清涼曠高氏子依洪公披剃年十四
入講肆二十四受大戒解孟蘭等鈔日誦大乘不少
懈詔入殿廷賜坐應對稱旨授僧統從慶壽海雲和
尚咨決心要年六十九坐化

文才字仲華隴西楊氏子博學能文續輯慧燈集釋賢

首疏構室松下人稱松堂老人成宗特旨建寺臺山
賜額大萬聖祐國寺命主席嘗坐山三日忘歸弟子
尋之始得大德六年唱寂閣維得舍利百粒進呈勅
建塔追封邽國公

慧印字弘教關西張氏子少業儒長業釋藏居太行之
阿修一相三昧七年根塵脫落皇慶元年詔至京講
經於安國寺賜紫衣香藥遣旌幢送至萬聖祐國寺
至治二年英宗幸臺山陪駕遊南臺獲嘉應賜幣及

玉文殊像七寶念珠文宗命住承天寺授一品銀印
固辭至元三年示寂

唯德正定人姓孟經梵律論各探奧旨年二十至五臺
遂舍講就禪後卜居古公主寺終焉索紙筆書偈曰
五十一歲百拙一生不肯休歇清涼石虎報三更正
是還源去時節書訖而逝

明

壁峰禪師名寶金世稱金壁峰乾州永壽石氏子母張

氏好善壁峰生六歲依雲寂溫公剝落受具謁如海
真公於縉雲遂大徹悟真受記別且囑曰昔無用和
尚謂我云座下出三虎一彪爾其彪也爾緣在北當
詣朔方先是定中見一山有招者曰此秘魔巖也後
北遊五臺道逢蓬頭女子衣弊而五彩閃爍赤足徐
行一黑獒隨行問何所之答曰入山曰入山何為答
曰一切不為言訖而沒因就地建靈鷲菴元至正間
詔祈雨入京即大雨贈千金逾年復詔入值大雪夜

有紅光出室中賜寂照圓明大禪師號明洪武戊申
詔赴京住天界寺賜紫衣金鉢及御製詩壬子六月
集衆言別弟子請偈曰三藏十二部尚為故紙吾何
言為怡然坐逝茶毗得舍利無算建塔北臺文岫山
又賜詩旌之壁峰製華嚴字母佛事梵音清雅盛行
於世

具生吉祥中天竺迦維衛國人明初浮海來禮五頂閱
四載抵臺山駐錫壽安禪林洪武七月上聞其卓行

詔住蔣山開化石城聽法雲集八年春上賜詩曰談
笑般若生紅蓮十四年足疾不能行勅醫療之師附
奏欲歸五臺師別衆曰今將為五臺之行有能從我
者乎有一弟子曰某能從師舉足曰汝無這脚安能
從我至午盥沐跣趺而坐舉念珠示弟子擲珠於地
而化

大寶法王噶瑪拉烏斯藏人永樂間聲聞中國太宗遣
使西土迎之應召至京封如來大寶法王西天大善

自在佛性樂林泉奏辭遊五臺上賜旌幢傘蓋遣使
衛送命太監楊昇重修大顯通寺居之丁亥四月制
書褒賜明年師疏別入寂火化無物相傳關吏見法
王適西秦上所賜玉玦云又勅楊昇塑像於顯通法
堂

釋迦也夫天竺迦維衛國人永樂十二年來遊清涼冬
十一月遣太監侯顯詔至京入大內免拜賜坐頒金
印寶誥封大國師後辭還五臺一定七日乃起至宣

廟尤加崇禮六年辭歸西域

覺澄號古溪山後蔚羅人族姓張氏年十歲為牧童十
四從雲中天暉出家閱藏五載從默菴坐禪大興隆
寺景泰三年宗伯胡濙命往南陽香嚴寺自維大事
未明不一年而退登太山叅月溪往西蜀楚山於投
子山機緣相投朝夕入室山謂海雲曰香嚴只是聰
明見解道機未明在山往安慶看頌古聯珠集見趙
州凌行婆機緣往返豁然有省因思本叅無字話頭

如何不徹奮然一拶虛空迸碎身與僧堂泯然不見
再看無字話頭火中覓雪了然無疑越五日山自安
慶回謂海雲曰香嚴大事今番徹也明日正旦召衆
曰作者今有其人良久曰香嚴是也覺澄避席曰覺
澄不會佛法山曰我正要不會佛法的遂以法付之
天順五年住金陵高座寺不復出示寂於成化初
淨澄禪師西河張氏子誕時適二僧到門曰此兒非常
應名清正後出家行至雙城於路逢僧為落髮即初

命名者也尋遊五臺僧清美為易名徧叅悟古宿天
順初返清涼代王建普濟寺居之後脫化於寺有山
居詩傳世

寶印禪師初與楚峰玉堂同叅臨行大川和尚授以識
曰同去三人載一車後至臺山蛇溝三人同結菴遂
成叢林蛇溝俗名車溝也將入滅說偈辭衆逝

德清字澄印全椒人俗姓蔡氏年十二辭親入報恩寺
與雪浪恩並事無極法師內江趙文肅公摩其頂曰

人天師也德清以江南習氣軟煖宜入春冰夏雪苦
寒不可耐之地以痛自磨厲飄然北邁參徧融笑巖
偕妙峰登棲北臺之龍門老屋數椽在萬山冰雪中
日尋緣溪橫釣危坐其上忽然忘身衆籟聞寂身心
湛然如大圓鏡大事既徹光明四照慈聖后建祈儲
道場於五臺與妙峰寶主其事光宗應期降誕德清
乃棲東海之牢山慈聖遣使再徵不能致布金造寺
賜額曰海印丙申坐私造寺院戍雷陽成楞伽筆記

居五年住錫曹溪甲寅披剃返初服於是東遊吳越
赴紫栢之葬於雙徑弔蓮池於雲棲結菴廬山五乳
峰下專修淨業居四年復往曹溪示微疾沐浴焚香
集衆告別危坐而逝天啓三年之十月也弟子奉全
身歸五乳塔而藏焉後二十年復奉其龕歸曹溪將
荼毗啓視之膚理柔輒鬚髮郁然乃加髹漆於六祖
真身之側云

真可字達觀世居吳江太湖之濱俗姓沈氏五歲不語

有異僧摩頂曰此兒出家當為人天師遂能言年十七仗劍遊塞上行至蘇州遇雨宿虎丘僧舍聞僧夜誦八十八佛名心大說侵晨即解腰纏十餘金授僧設齋剃髮二十從講師受具戒參張拙秀才偈頭面俱腫一日忽悟腫處頓消自是凌轢諸方嘗曰使我
在臨濟德山座下一掌便醒安用如何若何過匡山窮相宗奧義遊五臺時書詩偈禪林競傳之至京參徧融笑巖歸吳復楞嚴廢寺於嘉禾創刻藏緣於徑

山再入燕訪憨山於東海復戒壇於檀柘西遊峨眉
下瞿塘過荆襄登太和憩匡廬復歸宗古寺謂人曰
海印不歸我為法一大負礦稅不止我救世一大負
傳燈錄不續我慧命一大負捨此一具貧骨釋此三
負不復走王舍城矣先是遊石徑山得琬公所藏貯
佛舍利慈聖后迎入內供三日特賜紫伽黎神宗手
書金剛經汗下漬紙遣近侍質問偈答曰御汗一滴
萬世津梁無窮法藏從此放光上覽之大喜及妖書

獄起逮入詔獄下所司訊而執政者意在鉤黨欲牽連殺之索浴說偈堅坐而逝癸卯之十二月也又十二年葬於徑山茶毗之日肉身儼然舍利無算云

國朝

清涼老人阿王老藏俗姓賈順天西山人十歲出家十八受具順治癸巳攝齋受戒西天上士諦視曰此中有五臺主人衆皆惘然洎己亥果以兼通番漢選主五臺年七十退居長坐不卧康熙癸亥秋

駕幸臺山

御筆題賜為清涼老人年八十有七口誦佛號端坐而逝
老藏丹貝蒙古人入衛籍為趙氏順治庚子掛錫五臺
沖澹疎朗解文義工翰墨

聖祖仁皇帝西巡獎賚有加既而入都請改建菩薩大殿

遂卒龕歸山

以上釋

解州

周

關令尹喜解人善內學常服精華隱德修行時人莫知
老子西遊喜見紫炁知有真人當過物色而遮之果
得老子老子亦知其竒為著道德經五千言授之後
與老子俱遊流沙化胡采芎勝實莫知其所終尹喜
亦自著書九篇號曰關尹子

漢

王喬河東人顯宗世為葉令喬有神術每月朔望常自
縣詣臺朝帝怪其來數而不見車騎密令太史伺望

之言其臨至輒有雙鳧從東南飛來於是候鳧至舉
羅張之但得一隻烏詔上方診視則四年中所賜尚
書官屬履也每當朝時葉門下鼓不擊自鳴聞於京
師後天下玉棺於堂前吏人推排終不搖動喬曰天
帝獨召我耶乃沐浴服飾寢其中蓋便立覆宿徙葬
於城東土自成墳其夕縣中牛皆流汗喘乏而人無
知者百姓為立廟號葉君祠牧守每班錄皆先謁拜
之祈禱輒應違犯亦能為崇帝迎取其鼓置都亭下

略無復聲焉或云此即古仙人王子喬也

晉

石鐘真人芮城人姓陳氏隱於北山石室中室頂懸石狀如鐘故曰石鐘真人一日有蟾負芝草來止石上真人視之曰我聞食芝草即輕舉然有損於蟾吾不忍為後蟾復置芝草於地因取而食之又有野鹿入洞同宿及來京鹿負行李隨之夜夢神人告曰此鹿乃龍也今大旱禱雨爾其收榜黎明收榜入靜室中

焚香默禱俄而雲布雨足明日官屬來謝則真人已與鹿冉冉而上昇衆皆以手加額焉

羅王峰夏縣人為瑤臺觀開山師世傳其得道為立祠有碑記

唐

侯道華芮城人初河中永樂道淨院有道士鄧太元鍊藥貯院內道華在院供給使常好予史手不釋卷或問要此何為答曰天下無愚懵仙人咸大笑之一旦

失之無所見惟脫雙履衣掛松上中留一詩云帖裏
大還丹多年色不移前宵盜食却今日碧空飛慙愧
深珍重珍重鄧天師他年鍊得藥留得與內芝吾師
知此術速鍊莫為遲三清轉相待大羅的有期下列
細字曰去年七月一日蒙韓君賜姓李名內芝配住
上清善進院時大中五年五月也方驗道華竊太元
藥仙去節度鄭公先以其事聞詔賜昇仙觀咸通三
年芮令高立簷於道華降生之地築臺刻石撰降生

臺記

宋

朔顰頭夏縣人世居邑北五十里高德大溝上有木橋
後出遊方外至明正德間有顰頭道人至橋自稱姓
朔指宅墓故址且言碓臼胡不見鄉人掘地三尺許
得之居數月傭耕張鸞家後倏不見

金

何南卿字東夫本蜀閬城挹秀坊御史之裔博極羣書

精義理學值亂倂於北金大定丁酉設貢舉於平陽
中選得免倂然絕意仕進往來汾晉從黃冠師宋披
雲名為志淵號清真子授以講衍之職披雲卒朝命
提點永樂純陽宮賜紫衣號淵靖大師至大辛亥卜
居芮城中條山水谷創樂全觀年九十一無疾卒著
南華經註十三卷水谷代腹七卷

李寶安邑人小字三十冬夏披中衣寒暑不侵談笑遊
塵市見者輒獲利人圖其像以為利市神金大定二

十年詔賜方外衣不受朝退失履而去自燕至安邑
二千餘里不二日還遺詩見藝文

劉飲水安邑人居西紐延祥觀得神仙服水法口吐金
蟬化去遺詩見藝文

元

毛道真夏縣人元至正間修養於瑤臺山既卒門人立
祠塑像祀焉後數年自河南募緣覓小車數輛載之
抵夏縣渡河濕隻履託以具炊先行及挽車人至詢

之則死已久矣一觀大驚視祠像隻履尚濕

明

萬蓬頭嘉靖時居芮城東灘狼窩之佛窰素工談論精
風鑑堪輿術言吉凶多應婦孺皆稱為蓬頭師至今
有王老人并遺蹟一日告人曰吾將遠行可泥封吾
窰門數日啓視如故他日又使加封固越數日復啓
視空諸所有咸以為仙去云

絳州

漢

張鐵脚漢季遊寓聞喜善服氣冬不爐夏不扇一足能立者數日人稱為鐵脚先生立長春觀居之

北魏

吳邵聞喜人道引養氣積年百歲神色不衰

隋

裴謚聞喜人大業中入白鹿山採鍊十數年與王敬伯為友敬伯曰仙海無涯盡歸乎謚曰吾夢醒者不復

抵迷敬伯遂遊京洛貞觀初拜參軍遷大理評事賜
緋奉使淮南舟次高郵一老人蓑笠鼓棹而過敬伯
視之乃諶也維舟握手延坐曰兄所須當以奉給諶
笑曰魚鳥各適何矜炫為吾市藥廣陵青園橋東數
里櫻園北車門即吾宅也敬伯至廣陵出訪之果有
車門漸進愈佳青衣傳命諶衣冠揖入棟宇器物悉
非人世所覩日暮促席燃九光燈光華滿座女樂數
十人皆絕色諶又顧黃頭曰王評事吾山中友別近

十年宜遠致麗姝黃頭唯唯旋引一姬自西階上敬伯視之似其妻趙氏趙氏亦熟目敬伯駭異之一青衣以玳瑁筆授趙氏乃趙氏素善者敬伯取坐間殷色李投之趙氏顧敬伯潛繫衣帶間將曙諶名黃頭曰送趙夫人回乃謂敬伯曰使君宿此得無驚郡伯乎且就館間時再來敬伯去五日將還復詣之則一荒涼地也惆悵而行及京奏事畢抵第趙氏怒曰女子誠陋奈何致以悅人朱李尚在也敬伯始悟諶得

仙矣

唐

司馬子微洛州溫人傳辟穀道引術無不通睿宗嘗召
入掖廷問道答曰為道日損損之又損以至於無為
夫心目所知見損之尚不能已況攻異端而增智慮
哉上曰治身則爾治國若何對曰國猶身也故游心
於淡合氣於漠與物自然而無私焉而天下治上喟
然曰廣成之言也開元中再召至都詔於王屋山置

壇室以居善篆隸命以三體寫老子刊正文句又命
玉真公主及光祿卿韋縚至所居按金籙設祠厚賜
焉卒年八十九贈銀青光祿大夫字正一先生上親
文其碑

裴脩然楚州刺史思訓之子開元中為道士嗜詩酒工
丹青嘗夜醉卧街犯禁賦詩曰遮莫蓼蓼動須傾滿
滿杯金吾如借問但道玉山頽

裴航聞喜人長慶中下第遊鄂渚偶與樊夫人同載航

見其國色慕之賂侍妾裊烟以詩達意曰向為胡越
猶懷想况遇天仙隔錦屏儻若玉京朝會去願隨雙
鶴入青冥夫人得航詩若不聞使裊烟持詩答航曰
一飲瓊漿百感生玄霜擣盡見雲英藍橋便是神仙
窟何必崎嶇上玉京航亦未達詩之旨趣後經藍橋
驛渴甚向老嫗求漿嫗呼女雲英擎漿與航英色芳
麗航憶夫人詩句異之願納聘焉嫗言已有靈丹須
玉杵臼擣之有此當相與航購得之嫗仍令航擣藥

百日嫗吞之先入洞告姻戚來迎航及女就禮引見
諸賓一仙嫗謂航應相識否航不省曰不憶鄂渚間
同舟事乎航驚怛陳謝始知夫人即雲英之姊後航
及妻入玉峰洞為上仙

王刁河津人隱居龍門山得道

王先生隱王屋山常衣紙襖人呼為王紙襖見宋曾慥
集仙傳

許碯高陽人累舉不第學道於王屋周遊名山洞府每

遇石崖峭壁輒題云許碣自我崑山尋偃月子到此
後上酒樓醉歌仙去

金

呂道章垣曲人金大定間為縣吏夜夢神告以修養術
寤即避役居洪慶觀道成治疾有奇驗尋重修觀工
訖解衲置黃河水面坐其上順流而去莫知所終

丁善淵垣曲人幼聰敏通經術年十六為洪慶觀道士
賜以紫衣通元號尋授法錄呵禁厲鬼胥有顯應貞



祐末紀邦瑞鎮守葛伯城性殘忍善淵諷諭全活者
甚衆年五十八一日升几而坐召徒作歌歌竟飛昇
其徒奉遺衣葬於觀北

元

張志朴稷山人鍊形苦性衲衣露膝行丐汾晉間脅不
占席者三十餘年一鉢之外餘無所奉城北創建洞
神宮賜號淳德大師至元十四年羽化

皇志祐稷山人年四十餘投龍翔觀梁先生受度閉關

三年建九陽洞於馬橋村雲溪菴於下文村預知化
期年七十有三端坐而逝即葬菴內明初地震崖崩
墓見中塑一真人二仙卿侍立次四弟子相向坐有
志銘

以上仙

北周

檀特師名惠豐飲酒啖肉語默無常逆論來事後皆如
言周文帝遣書召之檀特發至岐州會齊神武攻玉
壁檀特曰豈能至龍門也神武果不至龍門而還

唐

智旻智富聞喜鐵牛峪僧唐太宗屯兵軍乏糧旻富請以沙鍋為食餉三軍胥飽太宗神異之後勅建廣教寺以報云

慧涉絳州人俗姓楊幼從知深出家日誦數千言嘗入秦寓麥積山石室造百法論抄一十六卷涸井泉應因絕筆至蜀以法殪術士妖猴還憩中條山竹林精舍造維摩搜微記畧科般若心經抄無常經真釋四

分律科共二十六卷晚歸絳將化預戒衆三分其軀
一投水中一投郭外一隨煨燼勿塔勿銘以違佛戒
言已昇座而化茶毗獲舍利百餘粒舌不壞色如黃
金

僧法雲絳州人著辨量三教論三卷又十王三業論十
卷見唐藝文志

梁

誌公聞喜南丘村有誌公寺內有石刻記相傳誌公避

亂駐錫於此

宋

旻師稷山人姓邢氏初治儒術天才博瞻舉進士不第
遂落髮受具遍歷名山寓錫淮泗間鴻儒碩彥多與
遊目曰岸濱長老常食蔬茹衣鹿皮又號鹿皮道者
後遊姑射山終焉茶毗舌根不化瑩潤若玉太原王
宥撰記

元

廣裕稷山人九歲從顯公和尚祝髮後二十年得法於
雲素和尚通經律論藏蔚為四衆宗世祖設資戒大
會設法大內默契上心賜袈裟大德十一年示寂於
金仙寺七日顏色如生樹塔以葬趙孟頫撰碑記
丁八行者稷山人初居甘泉佛窰洞與守志同勅大閣
塑大佛一尊高丈六尺名佛閣寺即清涼院也

明

可良徽州人嘉靖間住錫聞喜神栢村大雲寺有禪行

睂覆過目面壁冥坐嘗早起遇盜於塗呵之盜終日

立不能去旱禱雨輒應

以上釋

吉州

金

王予可吉州人字南雲父本軍校南雲亦隸籍年三十
大病後忽發狂能揮筆作詩文及說世外恍惚事南
渡後居上蔡遇文士則稱大成將軍於釋則諦摩龍
什於道則騶天元俊於貴遊則威錦堂主人為人軀

幹雄偉貌亦奇古戴青葛巾項後垂雙帶若牛耳一金縷環在頂額間兩頰以青涅之指為翠靨衣長不能掩脛故時人有哨腿王之目落魄嗜酒每入城市人爭以酒食遺夜宿土室中人問其故其應如響其所引書皆世所無有人與之紙落筆數百言或詩或文多六經中語及韻學古文奇字壬辰兵亂為順天將領軍所得館於州之瑞雲觀南雲言於將領曰我不能住君家觀也越三日病卒後有見之於淮上者

又云安邑人小字醜人遊河南鄧州鄆城鄆陵等處
詩詞走筆如神禮部尚書趙國臣暨中州高士胥師
事之遺詩見藝文

隰州

宋

丘長春隰州人建隆間隱祈真觀修鍊一日空中仙鶴
繚繞駕空而昇留詩曰生死朝昏事一般幻泡出沒
水常閒暉光現處躍烏兔元景開時納海山揮斥八

絃如咫尺吹噓萬有似機關狂詩落筆成塵垢寄在

詩人妄聽間

此與棲霞丘祖乃二人也

曹仙媼攜幼女引一犬至大寧馬鬪關息大柳下左繫
鐵鞋跟已穿右握鐵杖滑如玉招水工求渡工以水
漲拒媼微笑遂攜女引犬步水面徑達東岸登石龕
中時羣犬隨吠居民趨視之媼與女胥示寂犬亦化
矣一境大駭為塑像祀之有禱輒應元人郝李隆有

碑記

金

仙姑馬守明永和民家女母夜夢玉童駕鶴自空降於庭曰暫寄汝腹覺而有娠幼敏慧及笄不事女工曰繁華非我志也既而父母喪謁甘泉女冠張妙清為師居三載適絳州舍李氏越明年上元日無疾枕肱而逝三日復甦語人曰予暫遊紫府會羣真耳自是不復穀食能前知吉凶疾者不假砭藥呵禁頓愈歲旱蝗設壇密祝三日雨降蝗滅歲歉化導富室設食

以賑後構菴於山林南社莊棲真養氣至至元戊寅
二月望日沐浴更衣大集徒衆留一絕云七朶金蓮
數暫來人世間闕功今補足紫府却歸還筆落端坐
而逝年六十有四

明

雲峰觀道士不知姓名萬歷己酉入水簾洞內四日始
出登千百尺石崖如履平地常坐樹杪絕穀不食年
許語人曰吾遊名山遂去莫知所終

李金仁隰州人修鍊祈真觀不解衣者三年餽遺却不
受移坐瓦窰坡三年不語亦不履後復移坐洞山上
以上仙

元

普資姓李氏隰州雲強里人幼師事汾州僧淨闇廣通
法論建崇福寺趙德元記

明

大柄俗姓張隰州人七歲披剃經懺大藏胥通精醫術

壽八十無病坐化

無名僧嘉靖間住大寧縣西道教村土人房芝供養之
後火出鼻中焚其殼芝築龕瘞之

國朝

道興字聖圓俗姓胡隰州妙樓山石室僧也苦志焚修
州人請住天寧寺南遊金陵六年募兩浙總制郎造
檀佛千六十尊又遊太原汾州歸建層臺高閣為隰
偉觀

以上釋

山西通志卷一百六十

欽定四庫全書

山西通志卷一百六十一

藝術

魏徵藝術篇析陰陽卜筮醫巫音律相術技巧而舉其尤著者曰言陰陽則箕子曉音律則師曠叙卜筮則史扁史蘇論相術則內史叔服姑布子卿語醫則扁鵲巧思則奚仲咸思倖造化通靈入妙或弘道以濟時或隱身以利物此多產於晉暨載於晉之紀乘

者也而例推其餘代不乏人一藝雖微其成也難矣
志藝術

唐

靈應侯俗傳神醫也在堯之時曾愈疾因立廟祀之廟
在長子縣西五十里方山之巔

金道華路史帝堯時有金道華種蘭

虞

古董父黃帝裔孫左傳晉太史蔡墨曰昔颺叔安有裔

子曰父好龍能求其嗜欲飲食之龍多歸焉乃擾畜
龍以服事帝舜帝賜姓董氏使豢龍封諸豸川豸川
氏其後也所居地有陂澤多生蒲葦因名其里曰董
澤明成化壬辰冬池水裂血鱗如鑑蓋龍蛻也今澤
旁尚多董姓澤在聞喜縣東四十里

夏

劉累堯之裔嘗學擾龍於豢龍氏帝孔甲獲二龍不能
食累為飲食之帝嘉之賜氏曰御龍受豕韋之後一

龍死潛醢以食帝帝饗之既而使求之懼遷於魯范氏其後也

周

辛廖晉大夫初畢萬筮仕於晉遇屯之比辛廖占之曰吉屯固比入吉孰大焉其必蕃昌震為土車從馬足居之兄長之母覆之衆歸之六體不易合而能固安而能殺公侯之卦也公侯之子孫必復其始

史蘇晉卜筮之史獻公卜伐驪戎史蘇占之曰勝而不

吉公曰何謂也對曰遇兆挾以銜骨齒牙為猾戎夏
交倅交倅是交勝也臣故云且懼有口懞民國移心
焉公曰何口之有口在寡人寡人弗受誰敢興之對
曰苟可以懞其入也必甘受逞而不知胡可壅也公
不聽遂伐驪戎克之獲驪姬以歸有寵立以為夫人
卒致禍亂後筮嫁伯姬於秦遇歸妹之睽史蘇占之
曰不吉其繇曰士刲羊亦无盍也女承筐亦无貺也
西鄰責言不可償也歸妹之睽猶无相也震之離亦

離之震為雷為火為羸敗姬車說其輻火焚其旗不利行師敗於宗邱歸妹睽孤寇張之弧姪其從姑六年其逋逃歸其國而棄其家明年其死於高梁之虛及秦穆公伐晉獲惠公明年歸惠公而質其太子圉又八年惠公卒文公入殺懷公於高梁言胥驗焉

卜偃晉掌卜大夫獻公伐虢圍上陽問於卜偃曰吾其濟乎對曰克之公曰何時對曰童謠云丙之晨龍尾伏辰均服振振取虢之旂鶉之賁賁天策焞焞火中

成軍虢公其奔其九月十月之交乎丙子旦日在尾
月在策鶉火中必是時也冬十二月丙子朔晉滅虢
虢公醜奔周後襄王出居于鄭文公將納王使卜偃
卜之曰吉遇黃帝戰于阪泉之兆公曰吾不堪也對
曰周禮未改今之王古之帝也公曰筮之遇大有之睽
曰吉遇公用享於天子之卦戰克而王饗吉孰大焉
且是卦也天為澤以當日天子降心以逆公不亦可
乎大有去睽而復亦其所也卒納王殺太叔晉侯朝

王王饗醴命之宥

卜招父梁太卜惠公之在梁也梁伯妻之梁嬴孕過期
卜招父與其子卜之其子曰將生一男一女招曰然
男為人臣女為人妾故名男曰圉女曰妾及子圉西
質妾為宦女焉

董因晉臣秦伯納晉文公因迎公於河公問曰吾其濟
乎對曰歲在大梁將集天行元年始受實沈之星也
實沈之虛晉人是居所以興也今君當之無不濟矣

君之行也歲在大火大火闕伯之星也是謂大辰辰以成善后稷是相唐叔以封瞽史記曰嗣續其祖如穀之滋必有晉國臣筮之得泰之八曰是謂天地配享小往大來今及之矣何不濟之有且以辰出而以參入皆晉祥也而天之大紀也濟且秉成必霸諸侯子孫賴之君無懼矣

史援趙史初趙盾夢見叔帶持要而哭甚悲已而笑拊手且歌盾卜之兆絕而後好史援占之曰此夢甚惡

非君之身乃君之子然亦君之咎至孫趙將世益衰
後盾卒子朔嗣為屠岸賈所誅趙氏絕十五年景公
立盾孫武

桑田巫晉人景公夢大厲披髮及地搏膺而踊曰殺余
孫不義余得請於帝矣壞大門及寢門而入公懼入
於室又壞戶公覺召桑田巫巫言如夢公曰何如曰
不食新矣六月丙子晉侯欲麥使甸人獻麥饋人為
之召桑田巫示而殺之將食張如廁陷而卒

巫臯梗陽人苟偃夢與厲公訟弗勝公擊墜其首戴而奉之以走見臯他日見諸道與之言同臯曰惟有事於東方則可以逞偃許諾乃請悼公伐齊師還偃瘳疽生瘍於頭卒

繁人晉弓工平公使為弓三年乃成公引之射不穿一札公怒將殺之其妻請見具言射法公如其言射穿七札繁人得出錫金三鎰

師曠字子野晉樂師審聲知音時稱多聞平公會諸侯

同討不庭齊侯畏晉師之衆脫歸夜曠告公曰烏烏
之聲樂齊師其遁果如其言楚人伐鄭乃曰無害吾
驟歌北風又歌南風南風不競楚必無功既而果然
師涓晉樂師呂氏春秋晉平公鑄大鐘工皆以為調矣
師曠曰不調後世有知音者將知鐘之不調也臣竊
為君恥之至於涓而果知鐘之不調也

史趙史墨史龜皆晉史宋公伐鄭晉趙鞅卜救鄭遇水
遇火占之諸史史趙史墨史龜曰是謂沈陽可以興

兵利以伐姜不利于商伐齊則可敵宋不吉史墨曰
盈水名也子水位也名位敵不可干也火帝為火師
姜姓其後也水勝火伐姜則可史趙曰鄭方有罪救
鄭則不吉不知其他乃止

姑布子卿見趙簡子簡子徧召諸子相之子卿曰無為
將軍者簡子曰趙氏其滅乎子卿曰吾嘗見一子於
路殆君之子也簡子召子母卹母卹至則子卿起曰
此真將軍矣簡子曰此其母賤翟婢也奚道貴哉子

卿曰天所授雖賤必貴自是之後簡子盡召諸子與語母卹最賢簡子乃告諸子曰吾藏寶符於常山上先得者賞諸子馳之常山上求無所得母卹還曰已得符矣簡子曰奏之母卹曰從常山上臨代代可取也簡子於是知母卹果賢乃廢子伯魯而以母卹為太子

蓋聶榆次人善擊劍荆軻嘗遊過榆次與聶論劍聶怒而目之軻出人或言復召荆卿聶曰曩者吾與論劍

有不稱者吾目之試往是宜去不敢留使使往之主
人軻已駕而去榆次矣使者還報聶曰固去也吾曩
者目攝之

漢

衛綰大陵人以戲車為郎事文帝仕至丞相

吾丘壽王趙人年少以善格五召待詔仕至大中大夫
子輿儀長孺皆西河人馬援上馬式表曰昔有騏驥一
日千里伯樂見之昭然不惑近世有西河子輿亦明

相法子輿傳西河儀長孺長孺傳茂陵丁君都君都
傳成紀楊子阿臣援嘗師事子阿受相馬骨法考之
於行事輒有驗效長孺又見尚友錄

魏

正始前有沙門學相遊懷朔舉目見人皆有富貴之表
以為必無此理燔其書而後皆如言乃知相法不虛
也

晉

崔懿之屯留人精相法與崔游友善劉元海遊上黨懿之見而驚顧語游曰此人非常大貴元海聞其善相引至別所解衣觀之當心有三赤毫長三尺六寸懿之拜曰鬚與此齊則表裏相應大貴逼矣元海稱尊號辟懿之起家中書監

公孫或襄陵人與屯留崔懿之皆善相及見劉淵驚相謂曰此人形貌非常吾所未見也於是深相崇敬推分結恩後淵稱尊號果如所言

郭公客居河東精於卜筮郭璞從之受業公以青囊中書九卷與之

郭璞字景純河東聞喜人受郭公青囊中書遂洞五行天文卜筮之術襁災轉禍通致無方雖京房管輅不能過也惠懷之際避地東南抵將軍趙固會固所乘良馬死固惜之不接賓客璞至門吏不為通璞曰吾能活馬吏驚入白固固趨出曰君能活吾馬乎璞曰得健夫二三十人皆持長竿東行三十里有丘林社

廟者便以竿打拍當得一物宜急持歸得此馬活矣
固如其言果得一物似猴持歸此馬死便噓吸其鼻
頃之馬起奮迅嘶鳴食如常不復見向物至廬江太
守胡孟康被丞相召為軍諮祭酒時江淮清晏孟康
無心南渡璞為占曰敗康不之信璞將促裝去之愛
主人婢無由而得乃取小豈三斗繞主人宅散之主
人晨見赤衣人數千圍其家就視則滅甚惡之請璞
為卦璞曰君家不宜畜此婢可於東南二十里賣之

慎勿爭價則此妖可除也主人從之璞陰令人賤買此婢復為符投於井中數千赤衣人皆反縛一一自投於井璞攜婢去後數旬而廬江陷璞過江宣城太守殷祐引為叅軍時有物大如水平牛灰色卑脚脚類象胸前尾上皆白大力而遲鈍來到城下祐使人伏而取之令璞作卦遇遯之蠱其卦曰艮體連乾其物壯巨山潛之畜匪兇匪虎身與鬼并精見二午法當為禽兩翼不許遂被一創還其本墅按卦名之是為

驢鼠卜適了伏者以戟刺之深尺餘遂去不復見郡
綱紀上祠請殺之巫云廟神不悅曰此是邾亭驢山
君鼠使詣荆山暫來過我不須觸之其精妙如此祐
遷石頭督護璞隨往時有鼯鼠出延陵璞占之曰此
郡東當有妖欲稱制者尋亦自死矣後當有妖樹生
然若瑞而非瑞辛螫之木也儻有此者應在東南數
百里期明年矣無錫縣歛有茱萸四株交枝而生若
連理者其年盜殺吳興太守袁琇或以問璞璞曰卯

爰發而殄金此木不曲直而成災也王導嘗令作卦
璞言公有震厄可命駕西出十里得一栢樹截斷如
身長置常寢處災可消導從其言數日果震栢樹粉
碎璞葬母卜地暨陽去水百步許人以近水言璞曰
當即為陸矣其後沙漲去墓數十里皆為桑田璞嘗
為人葬帝微服往觀之因問主人何以葬龍角此法
當滅族主人曰郭璞云此葬龍耳不出三年當致天
子也帝曰出天子邪答曰能致天子問耳帝甚異之

璞素與桓彝友善彝每造之或值璞在婦間便入璞
曰卿來他處自可徑前但不可廁上相尋耳恐客主
有殃彝後因醉詣璞正逢在廁掩而觀之見璞裸身
被髮銜刀設醊璞見彝撫心大驚曰吾每囑卿勿來
乃更如是非但禍吾卿亦不免矣璞終嬰王敦之禍
彝亦死蘇峻之難敦收璞將斬之璞謂行刑者欲何
之曰南崗頭璞曰必在雙栢樹下既至果然復去此
樹應有大鵲巢衆索之不得璞更令尋覓果於枝間

得一大鵲巢密葉蔽之初璞中興初行經越城間遇
一人呼其姓名因以袴褶遺之其人辭不受璞曰但
其後自當知其人遂受而去至是果此人行刑初庾
翼幼時嘗令璞筮公家及身卦成曰建元之末丘山
傾長順之初子凋零及康帝初將改元為建元或謂
庾冰曰子忘郭生之言邪丘山上名此號不宜用冰
撫心歎恨及何充改元為永和庾翼歎曰天道精微
乃當如是長順者永和也吾庸得免乎其年翼卒冰

又令筮其後嗣卦成曰卿諸子並當貴盛然有白龍者凶徵至矣若墓碑生金庾氏之大忌也後冰子蘊為廣州刺史妾房內忽有一新生白狗子莫知所由來其妾秘愛之不令蘊知狗轉長大蘊入見狗睂眼分明又身至長而弱異於常狗蘊甚怪之將出共視在衆人前忽失所在蘊慨然曰殆白龍乎庾氏禍至矣又墓碑生金俄而為桓溫所滅褚裒總角詣庾亮亮使璞筮之卦成璞駭然亮曰有不祥乎璞曰此非

人臣卦不知此年少何以乃表斯祥二十年外吾言
方驗及二十九年而康獻后臨朝有司以哀后父議
加不臣之禮璞之占驗皆如此類也璞門人趙載嘗
竊青囊未及讀而為火所焚

王叔和高平人為太醫令博通經史洞識修養之道精
診切纂岐伯華陀等書撰脈經辨最詳張仲景作傷
寒論文字錯簡未易序次求得叔和彙撰始成全書
見唐甘伯宗名醫傳考

王顯并州人景明四年公孫崇表頃蒙付并州民王顯
進所獻古銅權稽之古範考以今制鐘律準度與權
參合昔造猶新始創若舊異世同符如合規矩

北魏

祁纖河東人好相人世祖賢之拜為上大夫

郭善明甚機巧當文成時北京宮殿多其製作

范甯兒善圍棋孝文時曾與李彪使齊齊令江南上品

王抗與對甯兒制勝而還

高崇祖恒州人善天文每占吉凶有驗永安中特除中散大夫

北齊

王春河東安邑人少精易占明陰陽風角齊神武引為館客韓陵之戰四面受敵從寅至午三合三離將士皆懼神武將退軍春叩馬諫曰比至未時必當大捷遽縛其子詣軍門為質若不勝請斬之賊果大敗後從征討恒令占卜其言多中位東徐州刺史賜爵安

夷縣公

張遠遊河東人有道術齊文襄別置館京師而禮接焉
北周

龔儁字僧儁太原陽邑人也性沈謹善隸書特工模寫
太祖引為記室時侯莫陳悅阻兵隴右太祖志在平
之乃令儁偽為魏帝勅書與費也頭令將兵助太祖
討悅儁依舊勅模寫及代舍人主書等署與真無異
太祖大悅費也頭已曾得魏帝勅書及見此勅不以

為疑遂遣步騎一千受太祖節度大統初除丞相府城局參軍封長安縣男邑二百戶從復弘農戰沙苑進爵為子出為華州中正十三年遷襄洛郡守尋徵教世宗及宋獻公等隸書雋以書字所興起自蒼頡若同常俗未為合禮遂啓太祖釋奠蒼頡及先聖先師除黃門侍郎累遷撫軍將軍右金紫光祿大夫都督通直散騎常侍車騎大將軍儀同三司世宗二年以本官為大使巡歷州郡察風俗理冤滯還拜小御

正尋出為湖州刺史性靜退每以清約自處前後所
歷頗有聲稱尋加驃騎大將軍開府儀同三司改封
昌樂縣伯又進爵為侯增邑并前一千六百戶

隋

銅川府君善筮開皇四年文中子始生筮之遇坤之師
為上德而居下位之兆曰是子必能通天下之志遂
名曰通

北山黃公善醫先寢食而後鍼藥汾陰侯生善筮先人

事而後說卦

唐

李淳風太原人僑雍父播隋高唐尉棄官為道士有文學自號黃冠子注老子撰方志圖文集十卷並行於代淳風幼俊爽博涉羣書尤明天文厯算陰陽之學貞觀初以駿傳仁均厯議多所折衷授將仕郎直太史局尋上言渾天儀宜改造太宗異其說令造之至貞觀七年成加授承務郎十五年除太常博士尋轉

太史丞預撰晉書及五代史其天文律歷五行志皆淳風所作也又預撰文思博要二十二年遷太史令太宗嘗密召淳風訪以武氏秘記淳風言其兆已成因勸無殲疑似太宗善其言而止淳風每占候吉凶合若符契當世術家疑有神相非學習可致然竟不能測也顯慶元年以修國史功封昌樂縣男復詔與算學博士梁述助教王真儒等注五曹孫子十部算經令國學行用龍朔二年改授祕閣郎中又增損劉

焯皇極歷改撰麟德歷代戊寅歷術者稱其精密咸
亨初還為太史今年六十九卒撰典章文物志乙巳
占秘閣錄並演齊人要術等十餘部多傳於代子該
孫仙宗並為太史令

狄梁公性嫻醫藥尤妙針術顯慶中應制入關路由華
州蘭闌之北稠人廣衆聚觀如堵狄梁公引轡遙望
有巨牌大字云能療此兒酬絹千疋即就觀之有富
室兒年可十四五卧牌下鼻端生贅大如拳石根蒂

綴鼻纔如食筋或觸之酸痛刻骨於是兩眼為贅所
繩目精翻白痛楚危亟頃刻將絕惻然久之乃曰吾
能為也其父母洎親屬叩頭祈請即輦千絹置於坐
側公因令扶起即於腦後下針寸許仍詢病者曰針
氣已達病處乎病人頷之公遽抽針而肱贅應手而
落雙目瞪亦如初曾無病痛其父母親眷且泣且拜
則以縑物奉焉公笑曰吾哀爾命之危逼吾蓋急病
行志耳吾非鬻技者也不顧而去

丘延翰聞喜人永徽時遊太山於石室中遇神人授玉
經即海角經也洞曉陰陽依法扞擇罔有不吉開元
中為縣人卜葬地星氣交現太史奏曰河東聞喜有
異氣朝廷忌之遣使斷其所扞山詔捕之大索勿得
詔原其罪詣闕陳陰陽之說以天機等書進呈秘以
金函玉篆號八字天機拜亞大夫之官祀山仙祠
唐彬茂太原人有前知術高宗時老臨死封一狀詒其
妻曰吾死後年名垂拱即詣闕獻之慎勿開也垂拱

初其妻獻之狀中預陳唐室易周及突厥至趙定事
後皆驗

韓凝禮上黨人明易學撰著奇中明皇如京命凝禮撰
一著起立三起二偃凝禮曰此龍飛之象未占有孚
應在仲冬一陽動也後果驗凝禮起家五品潘炎為
之賦曰惟彼神著生而有知用知不測明以稽疑擢
九尺之纖幹伏千年之寶龜德圓而神兮無幽不及
其生三百兮其用五十惟聖人之觀象乃神動而鬼

入列八卦以效變翹孤莖而了立數彰得一命乃自
天同大橫之有夏表或躍而在田其察也深其功也
大稱美名於神物齊妙用於神蔡是曰元后茲為筮
從氣受陰陽夜分而彩露兼涵幽贊天地朝覆而輕
雲數重著而有靈立定天保可謂神助用光天造功
深莫善仲尼且許以鉤深屈於不知大公徒言乎腐
草著之立兮發其祥吾君得之尊以光明乎太極演
彼歸藏因卜祝之符瑞應天人之會昌

衛大經解梁人以文學聞常閉門絕人事周知天文歷象窮冥索元後以壽終墓於解梁之野開元中天水姜師度奉詔鑿無鹹以溉鹽田剡室廬潰丘墓甚多既至衛先生墓前發其地得一石刻字為銘曰姜師度更移向南三五步蓋先生之詞也師度異其事命工人遷其河遠先生之墓數十步

管涔隱者隱於管涔山李德裕掌記北門隱者謂之曰君明年當在人君左右為文翰之職須值冲主德裕

聞之愕然變色隱者亦悔失言避席求去德裕問何為對
曰君有宿緣其年秋登朝至明年穆宗繼緒召入禁苑

荆浩唐末沁水人善畫世稱荆關董巨為畫家正宗其
山水節要曰凡畫山水意在筆先大山尺樹寸馬豆
人此其法也遠人無目遠樹無枝遠山無皴高與雲
齊遠水無波隱隱似有此其式也山腰雲塞石壁泉
塞樓臺樹塞道路人塞石分三面路分兩岐樹看頂
額水看岸基此其訣也凡畫山水尖峻者峰平夷者

嶺峭壁者崖有穴者岫圓形者巒懸石者巖兩山夾
水者澗夾路者壑水注川者溪泉通川者谷路下平
土山者陂似土而高者坂若能辨別乎此則知山水
之彷彿也觀者先看氣象後辨清濁定衆峰之揖拱
列羣岫之威儀多則亂少則漫不多不少要分遠近
遠山不得連近山遠水不得連近水山要迴抱水要
滌迴茂林古寺樓觀可安斷岸顏隄小橋宜置有路
處人行無路處林木岸絕處古渡山絕處荒村水濶

處征帆林密處店舍懸崖古木根露而藤纏臨流怪
石嵌空而水痕凡作林木遠則疎平近則森密有葉
者枝柔無葉者枝硬松皮似鱗栢皮纏身生於土者
修長而勁直長於石者拳曲而伶仃古木節多而半
死寒林慘淡以蕭森凡畫山水須按四時春景則霧
鎖烟橫樹林隱隱山色堆青遠山拖藍夏景則林木
蔽天綠蕪平阪倚雲瀑布近水幽亭秋景則水天一
色霞鷺齊飛雁橫烟塞蘆渚沙汀冬景則即地為雪

水淺沙平凍雲匝地酒旗孤村漁舟倚岸樵者負薪
風雨則不分天地難辨東西行人傘笠漁父蓑衣有
風無雨枝葉斜披有雨無風枝葉下垂雨霽則雲收
天碧薄靄依稀山光淺翠網曬斜暉曉景則千山欲
曙輕霧霏霏朦朧殘月氣象熹微暮景則山啣落日
犬吠疎籬僧投遠寺帆卸江湄行人歸急半掩柴扉
或烟斜霧橫或遠岫雲歸或秋江古渡或荒塚斷碑
或洞庭春色或瀟湘霧迷如此之類謂之畫題筆法

布置更在臨時山形不得重犯樹頭不得整齊樹藉
山以為骨山藉樹以為衣樹不可繁要見山之秀麗
山不可亂要顯樹之光輝若能留意於此顧心會於
精微

王方慶雅有才度博學多聞篤好經典精於藥性活人
無算

裴元證河東人通儒術該曉圖讖

五代

馬重績字洞微少學數術明太乙五紀八象三統大厯
居於太原唐莊宗每征伐必問之所言無不中拜大
理司直晉高祖起太原被圍勢甚危急命重績筮之
遇同人曰天火之象乾健而離明健者君之德也明
者南面而饗之所以治天下也同人者人所同也必
有同我者焉易曰戰乎乾乾西北也又曰相見乎離
離南方也其同我者自北而南乎乾西北也戰而勝
其九月十月之交乎是歲九月遼助晉敗唐軍天福

初拜太子右贊善大夫遷司天監明年張從賓反命重績筮之遇隨曰南瞻析木水不自續虛而動之動隨其覆歲將秋矣無能為也七月而從賓敗賜良馬器幣三年重績上言歷象王者所以正一氣之元宣萬邦之命而古今所紀考審多差宣明氣朔正而星度不驗崇元五星得而歲差一日以宣明之氣朔合崇元之五星二歷相參然後符合自前世諸歷皆起天正十一月為歲首用太古甲子為上元積歲愈多

差濶愈甚臣輒合二厯創為新法以唐天寶十四載
乙未為上元雨水正月中為氣首司天監趙仁錡等
言明年庚子正月朔用重續厯考之皆合乃下詔頒
行之號調元厯重續又言漏刻之法以中星考晝夜
為一百刻八刻六十分刻之二十為一時時以四刻
十分為正此自古所用也今失其傳以午正為時始
下侵未四刻十分而為午由是晝夜昏曉皆失其正
請依古改正從之重續卒年六十四

宋

苗訓河中人善天文占候之術仕周為殿前散員右第
一直散指揮使顯德末從太祖北征訓視日上復有
一日久相摩盪指謂楚昭輔曰此天命也夕次陳喬
太祖為六師推戴訓皆預白其事既受禪擢為翰林
天文尋加銀青光祿大夫檢校工部尚書年七十餘
卒子守信

馮文智并州人世以方技為業太平興國中詣都自陳

召試補醫學加樂源縣主簿端拱初授少府監主簿
逾年轉醫官加少府監丞嘗隸并代部署淳化五年
府州折御卿疾文智診療獲愈御卿表薦之賜緋加
光祿寺丞咸平二年明德后不豫文智侍醫既愈加
尚藥奉御賜金紫六年直翰林醫官院東封轉醫官
副使祀汾陰又加檢校主客員外郎大中祥符五年
卒

薛化光絳州正平人善數術嘗以平晉策干太宗行在

召見罷歸適子奎始生撫其首曰是子必至公輔後
果執政云

苗守信訓子少習父業補司天厯算尋授江安縣主簿
改司天臺主簿知算造太平興國中以應天厯小差
詔造新厯及成賜號乾元厯頗為精密優賜束帛雍
熙中遷冬官正端拱初改太子洗馬判司天監未幾
轉殿中丞權少監事立本品之下俄賜金紫至道二
年上以梁雍宿兵令宰相召守信問以天道咎證所

在守信奏曰臣仰瞻元象及推驗太一經歷宮分其
荆楚吳越交廣並皆安寧自來五緯陵犯彗星見及
水神太乙臨井鬼之間屬秦雍分及梁益之間民罹
其災水神太乙來歲入燕分歲在房心正當京都之
地自茲朝野有慶詔付史館明年真授少監咸平三
年卒子舜卿為國子博士

高若訥并州榆次人彊學善記因母病遂通醫書雖國
醫皆屈伏張仲景傷寒論訣孫思邈方書及外臺秘

要久不傳悉考校訛謬行之世始知有是書名醫多出衛州皆本高氏學焉

張德明字顯道襄陵人性不喜華飾精醫術常施藥救人尤急於貧困遠近求者無虛日太原提刑种師道來求醫應手而愈師道悅遂以朝廷所降妙應大師勅旨易而與之因酬其功

張騏字公度潞州人家世業醫騏尤精於方脈意在活人不責其報黃魯直母安康郡君病秘結諸醫不能

治駢投餌即愈魯直感而厚贈之却不受

都嚮進士陵川人博學通醫徽宗時官宣議郎掌太醫院事遠邇求診應手愈能以其術鳴

僧懷丙正定人巧思出天性非學所能至河中府浮梁用鐵牛八維之一牛且數萬斤後以暴漲絕梁鐵牛沒於河募能出之者懷丙以一大舟實土夾牛維之用大木為權衡鉤牛徐去其土舟浮牛出轉運使張肅以聞賜紫衣

馬遠其先河中人後居錢塘工山水人物花鳥種種臻
妙獨步畫院光寧兩朝授待詔子麟能世家學然不
逮父遠愛其子多於已畫上題作麟畫蓋欲麟得譽
故後為畫院祇候

元

孫威渾源人幼沈鷙有巧思元初雲中來附守帥表授
義軍千戶從軍攻潞州及鳳翔皆有功善為甲嘗以
意製蹄筋翎根鎧以獻大祖親射之不能徹大悅賜

名伊克烏蘭佩以金符授順天安平河南平陽諸路
工匠都總管太祖嘗問諸將衣其甲者曰汝等知所
愛重否諸將對皆失旨太祖曰能捍蔽爾輩以與我
國家立功者非威之甲耶而爾輩言不及此何也復
以錦衣賜威每從戰伐民有橫被俘戮者輒以菟簡
工匠為言而全活之卒贈中奉大夫武備院使神川
郡公謚忠惠

孫拱威之子巧思如其父嘗製甲二百八十襲以獻至

元十一年別製疊盾其製張為盾斂則合而易持世祖以為古所未有賜以幣帛二十二年除武備少卿大都路軍器人匠都總管元貞九年為益都路總管兼府尹卒於官贈大司農神川郡公諡文莊

田忠良字正卿趙城人僑中山通儒家雜家言嘗識太保劉秉忠於微時秉忠薦之世祖視其狀貌曰是雖以陰陽家進必將為國用俄指西序第二人曰彼手中握何物曰雞卵視之果然又曰朕有事縈心曰當

是一名僧病耳上曰然國師也命秉忠試星厯遁甲
諸書諸生皆罕及詔授太史官上曰朕用兵襄樊累
年不決對曰在酉年矣至元十一年元帥阿爾哈雅
請益兵十萬渡江上密問曰汝試筮之濟否曰濟上
御幄殿曰今拜一大將取江南朕心已定果何人耶
忠良環視左右目一人曰是偉丈夫可屬大事上笑
曰此巴延也七月十五夜白氣貫三台曰三公其亡
乎尋劉秉忠卒獵御林駐輦曰朕有所遺曰其數珠

乎明日二十里外當有持之來獻者已而果然上問
南征將士能渡江否忠良曰明年正月當奏捷至期
果取鄂州嘗以違和問曰聖體行自安矣閱月愈賜
銀五百兩與丞相和爾果斯視山陵俄叛兵圍三匝
忠良引衆夜歸敵殊不覺和爾果斯以為神上賜黃
金十兩皇子北平王諾木罕丞相安圖征海都奏曰
不吉及諸王錫里濟刼入海都命忠良致禱曰無庸
皇子未年當還後果然駕駐龍興北奏曰宿衛士日

食一瓜豈能充饑上俾均其食汴梁河清三百里上
曰憲宗生河清朕生河又清今河復清何邪曰應在
皇太子命為太常丞少府為諸王強通建宅忠良仆
其柱曰太廟前豈諸王建宅所邪上曰卿言是也又
曰太廟前無馳道非禮也即勅闢道或請太廟牲不
用牛忠良曰梁武帝用麋為犧牲後如何邪將征日
本奏曰海隅何足勞天戈不聽武宗初進司徒奏冬
至祀天請以太祖配夏至祭地請世祖配制可皇慶

初卒封趙國公諡忠獻

靳德進潞州人祥子為人材辨幼讀書通大義父歿益
自刻勵尤精星歷之學太保劉秉忠選授天文星歷
卜筮三科管勾凡交蝕躔次六氣侵沴所言休咎輒
應時因天象進規諫多所裨益累遷秘書監掌司天
臺事從征納延揆日時率中機會嘗陳天道好生請
緩師以待其降又奏宜括天下術士設陰陽教官使
訓學者仍歲貢一人從之著為令成宗撫軍北邊德

進從行凡攻戰取勝皆豫尅期日無不驗者成宗初
歷陳世祖進賢納諫咨詢治亂之原上嘉之授昭文
館大學士知太史院領司天臺事或請以瓦易都城
苦廩德進曰若是役驟興物必踴貴議遂寢勅中書
自今凡集議政事必使德進預焉尋丐閒仁宗在東
宮特令中書留之上召見白海行宮授中書右丞議
通政院事領太史院如故以疾卒追封魏國公謚文
穆

劉致字時中河東人官翰林待制風情高簡蚤負聲譽
能篆著復古糾繆編傳世行草宗晉人而不純熟

孫公亮渾源人世業造甲元初授諸路工匠總管公亮
少有志練習國典後拜監察御史累官江西等處行
工部尚書致仕

朱好古襄陵人善畫山水人物與同邑張茂卿暢雲瑞
俱以畫名人得之若拱壁號襄陵三畫

王翼陽城人穎悟強記旁通律歷尤工詩因染疾棄進

士業精求醫術療人多奇驗著素問注疑難傷寒歌括若干卷算術一卷詩五百篇

秦邦紀壺關人號雲岑子至元間以善畫賜官待詔嘗畫五龍廟牧鶴圖見明四輔杜穀序

呂義字伯宜平定州人善易學尤精卜筮堪輿星厯諸術勅授晉寧路教授子豫有父風世其業授饒州路陰陽學教授

孫固太平人號古真道人始誕時姑射山草木不生者

三年長於儒術兼精閏法百工技藝無所不通人稱
為百會先生

梁周泰字白亨元至正間授平陽路醫學教授子權孫
叔東皆世其業人稱其有濟人功

李肯堂高平人巧思強記善楷書及篆籀之學有西溪
法帖傳世

魏文昌壺關人元季入神宇見梁端有書取視則風雲
變色持歸鑿地窖肄習之遂盡遁甲覆射之術嘗被

速剪紙為兔鋤禾雜沓競逐得脫川有桑掛其冠文昌
手拔殆盡迄今其地無桑云

彭舜安字國寶崞縣人世業醫頗通儒書自號西林翁
延齡羽化葬於歷師坡下後里人多見之又傳椒寢
有疾遣使召之遇諸塗既愈辭歸詔賚其家則歿已
數年矣因立廟刻石以紀云

明

韓昌洪洞人家世業醫有陰德時見推車者仆道診視

知寒移暖室藥之汗愈及行資以米洪武初避兵岳陽山中遇異人授秘術不踈診視一見即知人生死孫肅七歲誤吞鐵釘舉家惶遽文昌曰勿憂三年後釘當出他日且生貴子後釘果從脇下出已乃生忠定云

申九寧屯留人精天文數學洪武初授五官挈壺能逆占吉凶上召問應對如響

白能嵐縣人通書史雅善丹觚永樂間詔至闕下上覽

畫深賞之賜冠帶以寵異焉

王順胡良保德州人善繪事永樂時建太廟徵天下繪士詣京師良順偕往繪畢成祖往視以手撫順肩稱賞不置仍命繡御手於肩焉

馬繪安邑人精陰陽術永樂七年以薦辟授禮科給事中終欽天監監副

全寅安邑人少瞽性聰警學京房易占斷多奇中英宗北狩陰遣太監裴當問之寅筮得乾之初九附奏曰

龍君象也四初之應也龍潛躍必以秋應以壬午決
歲而更龍變化之物也庚者更也庚午秋車駕其還
乎還則必幽或躍應焉後七八年必復辟午火德之
正也丁者壬之合也其歲丁丑月壬寅日壬午乎既
而也先復入寇石亨召問休咎寅筮之曰無能為也
且彼氣已驕戰必克果敗去及英宗還居南宮指揮
盧忠上變妄言請寅筮之寅叱以大義曰是大凶兆
忠大懼佯為風狀後英宗復位授錦衣衛百戶子孫

世襲

武璵字大器介休人性聰敏母久病乃之抱腹巖研究
內難諸書三年以脈訣未真遠遊參得異人傳治病
按脈決生死若神遇危症出巧思治之沈疴立起璵
嘗戒子孫非甚明理勿輕學醫云

呂瑛義裔孫精醫道為醫學典科天順間召入侍御藥
局名動中外後請告卒於家

陳璉字宗器稷山人繪山水諸科胥極精妙成化中繇

布政司都吏除金吾右衛指揮使經歷陞趙州判官
子嶂孫桂能世其業

喬莊簡公樂平人能為四體書而隸筆尤佳今西北諸
名山多存詩記題名

李良貴字廷爵孟縣人祖福全本農遇異人授以鍛鍊
雲根之術且曰爾後世子孫必致位公卿父鎮繼役
營建有勞官文思院大使母陳氏感異夢而生良貴
性穎悟通經史正德甲戌授文思院副使嘉靖間轉

營繕所所副建大工屢蒙賞賚歷陞中憲大夫晉嘉
議大夫通政使疾卒殯承天之郵舍有司辦棺衾繇
驛歸里賜祭葬

王敷聞喜人偉幹修容能詩弘治間以天文授欽天監
臺官與當時名公倡和脊推重焉

梁承齋稷山人大書二尺以上最有名小行草疎爽不
密而無俗氣

宋銓潞州人嘗遇異人授秘方嘉靖八年郡別駕傅必

金史卷一百六十一
用夜宴德風亭醉墮折左股衆醫莫能治銓出藥三粒大如豆啖之骨尋續有聲更以手熨起行如常一時稱神

萬瑄潞州人通元理善畫寫意胥入神年九十猶作小景見王公長揖不拜人皆重之

溫徽介休人知府廉之子嫻於彈弓流賊寇城徽發三彈中三賊之目賊駭解去又善琴棋書畫寫竹尤工杜纘字字公甫陽曲人幼補弟子員得羸疾因治岐黃

家言以意自藥凡八年而病愈間療人疾他醫謝技窮宇多以奇收之邑人王道行邁危疾宇投劑十餘有起色謂宜靜攝王不戒忽嘔痰數升營脫脈代太谿絕指下纘宇曰代脈有暴損者可治戒勿飲食日夜進附子獨參湯又為灸靈天樞氣海關元諸穴百餘壯脈始得還凡服參盡十斤附子八兩有奇不雜他藥一銖百餘日而愈或云附子毒纘宇笑下附纘二十分之一而以參制之毒將焉施蓋用附以直達湧泉

健參力下行譬如命大夫頤指賊曹捕誅不道若嫌其猛利是偵卒游徼無所用而爪牙可廢也聞者胥服然纘字品殊介雅不欲以醫見巡撫魏允貞母病或以纘字薦纘字固謝不往魏屏侍從詣室跪請乃行病愈魏出諸醫方視之纘字指一方曰此與愚意同但愚必百劑乃克痊公求效太速彼一投不效即斥矣公可以酬某者酬之魏益加敬後以明經授兗州府別駕王文端公家屏善楷書在翰林時神宗甚愛重之嘗命

諸講臣書扇公書訖誤用私印竄滅其跡上問故諭
復用私印而手擇十扇獨畀家屏書凡答客札無慮
數千百字筆不少懈盈楮嚴毅對之令人生敬

楊炳字文彪蒲州人精醫術決人生死不爽嘗赴安邑
宿逆旅一少年欲試之從窗牖躍入僵卧牀上呻吟
求救炳診視大驚曰郎君殆將不起左右皆竊笑是
夕少年果死或問其故曰腸已裂不可復治也其後
世多習醫州人稱為藥丸楊氏崇禎間侍郎李立祠

州城東門

高應元太原人行草書奇逸飛動而署書尤絕今存縣北甕城暨古城寺懸鏡中天便是西天二署

韓醫婦介休人以醫術遊四方孝義令周祐母患噎湯勺不入口奄奄垂盡聞韓婦治噎有奇術僕馬迎之至以花椒煮水令屢漱之出一白石長三寸許六稜而末銳隱隱紅紋如線納之口中令咽其液數以指摩搯咽喉外用箸探吻喀喀然出一肉片卷之狀若

虬能蜿蜒動婦言噎人者其物有二一居喉一居心
坎仍治如前法復出一物隨呼麪茶食之三日而起
贈以絹錢及所乘馬婦取錢餘謝弗受周令為刻石
以志之

朱表抄字竹溪陽曲榮靖王曾孫好讀秦漢以上書工
詩賦善草書少子知鰲能世其家學

劉居仁字元儒號雲谷山人善篆隸篆刻尤絕叅政傅
霖嘗館之

金少川先生集卷一百六十一
陳魯高平人少學易入五臺見老翁授開心符魯跪吞
之遂明卜筮陰陽九宮兵法風雨無不立應

王友古高平人博物洽聞尤精天文及九章法且布算
而知人之隱嘗集渾天欹器銅烏漏刻候風諸巧製
并圖之以為準

申相長治人業岐黃研究脈理尤精傷寒一科著診家
秘要傷寒捷法歌稱良醫云

張英平陽人幼穎悟不事師傳善畫人物翎毛尤工戲

墨號平水翁有編集畫譜行世平陽知府樊瑩有溪
山不減王摩詰臺閣無慚董伯仁之句

楊文昭字震寰蒲州諸生屢試不售隱於藝嘗以梅檀
作佛像宛如生人遊京師諸貴人多招致之楊昂藏
自負恥於干謁其所交皆一時名彥最著者如韓少
師燬呂尚書惟祺錢尚書龍惕曹中丞于汴程布衣
嘉燧而於錢程稱莫逆今錢集中約震寰遊吳程集
中贈蒲州楊生稱磊落奇男子者皆謂文昭也

金少川先生集卷一百六十一
王復九絳州人善草書莊烈帝甚賞之謂有北人勁氣
嘗下御帖令草數幅以進

翟師程襄陵邑諸生善書不撫前人筆法而自成一家
更精畫龍虎山水人物亦不蹈尋常蹊徑

郭世元潞安人書畫胥絕沈平度令藍田延世元臨摩
詰輞川圖雲林山水臺榭人物毫髮絲縷備極工巧
晚年宗巨然潑墨更為蒼潤識者競珍賞之書撫聖
教黃庭才思亦敏有遺賦百二十篇

李春先雲中世醫精研脈理全活多人時呼為李仙
穆香郎嵐縣人生有道術樓居嘗有言談聲及視之無
所見能用鐵點金年三十而逝

國朝

王适字古弦陽曲人偉幹修髯善飲酒終日夜不醉工
墨畫初宗韶秀晚彌雄蒼

三銅道人不知何許人諸生成周佐母病喉百藥罔效
一道人過門索疏具見之曰喉有祟吾為手療否且

殆矣擊所持棕扇柄出紅丸七令吞之又彈頂後吐
數肉蛾蠕蠕動旋納之袖中語周佐謝我三斤銅足
矣取以付再出失道人所在殆非世人也遂著三銅
道人傳傳諸人周佐才而有義聲高平畢振姬與之
友

趙文徵字鳳伯順治時貢士善畫山水空絕依傍奇古
自成一體間題小詩亦清老可觀

吳燧號芝田臨汾人善書邑關帝廟春秋樓三大字高

丈餘燧醉後縛帚為筆信手揮成墨瀋淋漓識者疑有神助

趙興運榮河人性恬雅不喜紛囂通天文望氣占風六壬奇門諸數順治初偶語儕輩曰某夜觀天象執法星北流會巡按劉達私出適廁其側聞之愕然


衛侶瑗曲沃人精醫術於脈尤精決人生死如響友人劉玉生方娶婦侶瑗曰是女有病吾當診其脈五年後當不起後五年果卒著家傳纂要鍼灸全書兩書

賈舍人荆生為序以徐秋夫稱之

曹鶴徵絳縣人遇異人授鍼法沈疴宿疾應鍼而起四方至者戶外屨常滿年九十有八歲神彌旺

孟必達字泰交沁州人善六壬數有以失物叩之者必達曰此四足物非牛非犬當為猫其人笑曰是也必達曰向東南求之得矣如其言果得猫州牧汪宗魯子歸江南愆期不至汪憂之召問必達曰此蓋問行人也即至矣汪方在疑似間必達又曰已入北門矣

汪益疑之言未已子果至繞道京師果入自北門也
汪以為神顏其問曰前知



山西通志卷一百六十一